

今世說







今世說

王璋撰

編主五雲王

編初成集書叢

說 世 今

中華民國二十四年十二月初版

撰 者 王 暉

發行人 王 雲 五
上海河南路

印刷所 商 務 印 書 館
上海河南路

發行所 商 務 印 書 館
上海及各埠

(本書校對者沈鴻俊)

今世說序

古無今。今無人。則其說已。若言足傳人。人足重世。何讓古人。使今獨閔寂哉。或曰。國有史。其大也。傳曰。否。大者傳其人。細者傳其神。且而亦知日影穿隙乎。不必出見日。識全日矣。則夫一言一行。傳其人之神。何以異。是王先生丹麓。讀書不下古人。結交必上今人。予讀其所著書。皆自成一世。謂非今人能說。亡何而今世說又成。見其包舉羣彥。言關至極。簡秀詔潤。胸無宿物。儁不傷道。而巧不累理。嗚呼。直世說耳。何今之見哉。夫一世所傳。不過數人。人率不過數語。今俊顧廚及。轉多于昔。善談名理。爭勝于舊。此固秀良輩出。神鋒太雋然耶。乃吾獨多王先生之殫見洽聞。能使休明一世如此也。先生曰。愚不逮古。而闕其讒險。仇隙數則。卽其說不全。補乎其俟。予曰。是隙之日也。必排闥撤瓦。以延光明。將疑無全日哉。知此。卽簡傲汰侈惑溺。善讀書者。猶將闕之。而補于何俟。先生善予言。乃著於篇。

同郡馮 景香遠撰

今世說序

同邑丁 澎藥園撰

宋劉義慶撰世說新語。宏長風流。雋旨名言。溢于楮墨。故通人雅彥。君履少年。皆喜觀而樂道之。其後有瑯琊補華亭語林。溫陵初潭。秣陵類林。其書咸有可觀。然以視世說有閒。其故何也。蓋劉去晉未遠。竹林餘韻。王謝遺風。不啻耳提而面命之。其涉筆簡而該。其命意雋以永。去其稂莠。掇其菁英。誠史家之支子。而藝苑之功臣也。今王子丹麓。萃數十年以來見聞所及。輯爲一書。取精多而用力勤。幾與世說並時矣。譬之飲食。大官之饗。有時厭飫。楂梨橘柚。則齒頰生津。矧所採輯。皆一時名流。披卷展玩。有如晤對。昔人命千里之駕。作永夕之譚。今得于寸楮遇之。詎非快事哉。近梁水部慎可有玉劍尊聞。而吾友陸景宣著口譜。徐武令著廣羣輔錄。丹麓此書。真堪媲美。見我武林之學。必原本古人。非妄爲作者也。故不辭而爲之序。

今世說序

遂安毛際可會侯撰

康熙癸亥秋。予有兩浙通志之役。其人物多得之於墓碣家乘所傳。浮夸失實。刪訂爲煩。而王子丹麓。乃以今世說見示。誦之清風襲人。耳目爲之一易。昔人謂讀晉書如拙工繪圖。塗飾體貌。而殷劉王謝之風韻情致。皆於世說中呼之欲出。蓋筆墨靈雋。得其神似。所謂頰上三毛者也。丹麓少負異才。所著霞舉堂集。流布藝林。而是書自謂非海內第一流不登。且又遲之又久而後成。撰緝旣專。品隲彌當。如德行言語諸科。固當奉爲指南。卽忿狷惑溺。迹涉風刺。要無傷於大雅。縱使其人自爲讀之。亦復粲然頤解。至於贈言同人。亦閒採一二。爲丹麓寫照焉。大率與臨川所撰相爲伯仲。比諸元朗。駕而上之。予謂臨川宗藩貴重。纘潤之功。或有藉於幕下。袁鮑諸賢。而元朗自西漢以逮金元。上下數千百載。供其掇拾。乃丹麓以一布衣。僻處窮巷。斟酌損益。一出一心裁。且止以四十年來。賸記所及。而工妙如此。則其難易固相倍蓰矣。昔典五一代清言流弊。而本朝綜核名實。不尙虛無。集中單詞隻簡。清英淵雅。適可爲鼓吹休明之助。有昔人之功。而無其過。讀是書者。亦可以論世云。

今世說序

自經史而外。著述之家。不知幾千萬計。而其書或傳或不傳。卽幸而傳矣。人或有見有不見。獨世說新語一書。纂于南宋。多摭晉事。而兼及于漢魏。垂千百年。學士大夫家。無不翫而習之者。雖臨川王之綜敘。清遠自高。亦以生當其時。崇尚清流。詞旨故可觀也。至於今讀其書。味其片語。猶能令人穆然深思。惟恨不得身親其際。與爲酬酢。假得王謝桓劉羣集一室。耳提面命。其心神之怡曠。抑何如耶。今朝廷右文。名賢輩出。閱閱才華。遠勝江左。其嘉言懿行。史不勝載。特未有如臨川哀聚而表著之。天下後世。亦誰知此日風流。更有度越前人者乎。予不敏。志此有年。上自廊廟縉紳。下及山澤隱逸。凡一言一行。有可採錄。率獵收而類紀之。橐凡數易。歷久乃成。或疑名賢生平大節固多。豈獨藉此一端而傳。不知就此一端。乃如頰上之毫。睛中之點。傳神正在阿堵。予度後之人得覩是編。或亦如今之讀臨川書者。心曠神怡。未可知也。雖然。臨川取漢末魏晉數百年之事。網羅編次。遂勒成一家言。而予欲以數十年中所見所聞。與之頡頏。世有覽者。毋亦笑予之心勞而日拙也夫。

康熙癸亥仲春。武林王暉。題于牆東草堂。

今世說序

歸安嚴允肇修人撰

夫學者屈首受書。一聞古人之名。輒俛焉歎阻。所恨生不與之同時。不獲聆其緒言。觀其行事。然而古人之言行。載在簡編者。可考而知也。試思四海九州之大。光嶽之氣。蘊降鬱積。豈無有一二媿美古人者哉。豈無有乘時挺生。卓犖魁傑。能創古人所未見者哉。而循誦習傳之輩。以爲今人也。而槩忽諸。此其人縱令生與古人同時。日聆其緒言。觀其行事。亦漠然不相接。以終其身焉已矣。予友武林王子丹麓。學瞻而行脩。潛心經世大業。一時賢豪長者。多慕與之遊。所著詩歌古文。宏深奧衍。不啻富金匱而續青箱矣。已復手訂今世說一書。蓋祖劉氏所作世說新語。而稍節其條目。予受而讀之。自清興以來。名臣碩輔。下逮巖穴之士。章句之儒。凡一言一行之可紀述者。靡不旁蒐廣輯。因文析類。以成一家言。其大要采諸序記雜文之行世者。而不敢妄綴一詞。其詳慎不憚煩如是。丹麓又言。臨川當日。以今人述古人。故取裁多而徵信亦易。吾之爲此。以今人述今人。見聞多所闕遺。書未成而訾警者紛起。吾甚悔其拙也。予曰。不然。臨川之書。敍列晉人者居多。而上逮于東漢三國諸君子。夫晉人尙清談。一時名流慕效。相與蔑棄禮教。脫

略形骸。以爲曠達。其流禍至於中原板蕩。神州陸沈。論世者於此。爲之三致慨焉。今去古日遠。士大夫鑒於先代末流之弊。駸駸乎抑遠浮華。敦尙實行。此亦轉移風會之一善機也。是編所載。多忠孝廉節之槩。經緯權變之宜。其大者實有裨於國家。有功於名教。至於風雅澹詞。山林逸事。足以啓後學之才思。資藝林之淵藪者。無不表而出之。雖其人之生平。不盡此數語。卽是編亦不足以盡當世之賢豪。而條疏節取之下。使人人解頤欣賞。如入寶山。如遊都市。其爲益也。不旣多乎。且夫後之視今。猶今之視昔也。又烏知過此以往。不有好學深思者起。而酷嗜此書。加之博稽詳覈。以備一代人文之盛。而後乃知丹麓倡始之功。爲不可泯也。豈得謂古今人不相及。而遂有所軒輊於其閒哉。予故因丹麓之請。而爲序之者如此。

今世說評林

洪暉吉曰。自劉義慶創爲世說新語。而劉肅倣之爲唐世說。何良俊廣之爲語林。李紹文復成皇明世說。至本朝文物之盛。其持論風旨。尙無有編輯成書者。丹麓王子。殫見洽聞。凡數十年中之軼事。莫不排纂而表著之。相其體製。直欲遠攀新語。近抗語林。何止壓倒唐明世說也。

林西仲曰。品必取其最高。事必取其最奇。語必取其最雋。不須復道。卽撫拾之廣。似非積數十年之用意。未易得此。予嘗語人云。入杭若不賞識丹麓。必非佳士。或不爲丹麓所賞識。亦非佳士也。讀此尤信。顧且菴曰。丹麓著述等身。上下古今。探微索奧。藝林得其片玉。莫不奉爲拱璧。茲復成今世說一編。言近旨遠。真得晉賢風味。予每嘆世人去古已邈。凡可悲可愕之事。接於前。漠焉如不相關。曾不思所以幹旋補救之。丹麓獨能於冷語佚事。隨所睹記。皆逼露其精神。誠天下有心人也。且以見動止語默之細。皆足爲讀書窮理之助。學者其容忽諸。

薛依南曰。世閒無可食。亦無可說。此季充語也。世閒豈無可說者。蓋不屑爲說也。其傲已甚。夫說自在世。我不能強爲噤。猶之不能越爲代也。以說還說焉可。古世說如是也。今世說亦如是。存而不論。案而不斷。

若曰。記事論世。自史氏職。我不能越爲代也。敢曰無可說焉。而不屑也者。是以說還說也。丹麓王子。可謂恭矣。

張祖望曰。王子年著拾遺記。摭拾魏晉遺事。以姚馥金磬。茂先海苔。列之卷首。今丹麓以梁尙書家清。徐中丞至孝。爲開卷第一。高于東陽崖谷人遠矣。

葉林屋曰。此一部佚史也。雖單辭癖事。足以傳人。晉王右軍功業文章。不入世說。而獨稱其工書。政不以此掩彼。丹麓是書傳人之志也。惟其單癖。于是乎不朽。

毛稚黃曰。王子丹麓。著今世說。所載大半同時交好。不然。亦其所知者也。其人寂寂者。固不遐遺。至若或負重名。或已鼎貴。而丹麓輒取片語。微事寫之。乃轉覺其栩栩然。行閒字裏。幽隱畢現。畫家六法。以氣韻

生動爲最難。此卷之墨妙極矣。雖然。丹麓固欲以獎美傳其人。然按其標部。由漸而至末。佳處固多佳。或亦有佳。而猶未免是病者。連城之壁。光氣如虹。有微類焉。則良工亦不掩之。是在解人善讀書耳。

吳慶百曰。劉氏世說。語本塵尾松枝所成。蓋何平叔清談之餘。後之竄入者。大不類本書。以彼片言單辭。另存鑪錘。足甘口吻。非凡響能及耳。丹麓雅人。頡頏二晉。睹此便欲突出其上。近與梁氏玉堂錄。汪氏說

鈴同行。鼎峙文苑矣。

黃主一曰。丹麓先生。鍵戶著書。花木竹石。位置幽閒。四方名流。過武林者。必願交先生。先生卽其著述。採

其可紀者。依劉義慶例。集爲今世說。一時才人學士。風流逸韻。具見是焉。交遊道替。旅進旅退。萍梗泛然。先生以朋友爲性命。凡纖芥之長。不啻口出。并爲傳之。其樂道人善。留心人物如此。

丁素涵曰。臨川王世說。多採漢魏兩晉逸事。風流綿邈。至今傳之不衰。丹麓王子。繼而爲今世說。窮搜廣輯。較之古昔。爲尤難。然其博稽雅贍。不減臨川。此書一出。卓老初潭。元朗語林。直可覆轡矣。

鄭官五曰。世說新語。多載王氏事。而太倉二王先生。又刪定而批釋之。何王氏之多賢也。茲編縱橫採掇。而遠識拔俗。與前代諸編指趣則一。豈惟一世。雖千百世。其若貫矣。一以爲談助。一以爲要略。非青箱緘中。安得有此。

周敷文曰。今世說。言簡而味長。耐人尋繹。如入桃花源。步步俱著勝地。其書故在語林初潭以上。叔驚瀾曰。世說新語。三十六條目。今闕其六。或疑不及臨川王。不知南陔白華。未嘗有詩。夏五號公。何妨或缺。況舍短取長。愈見立心深厚。手是編者。毋謂松溪臨川。古今人不相及也。

今世說例言

一是集名賢。斷自本朝爲準。閒有文章事業。顯于勝國。而卒于本朝者。要不可不謂今之人也。亦爲採入。一世說例多異稱。鈍資難于記憶。是集名賢。或字或號。止載其最著者。雖至數見。俱各從同。以便披覽。

一是集條目。俱遵世說原編。惟自新黜免。儉嗇。讒險。紕漏。仇讎。諸事。不敢漫列。引長蓋短。理所固然。乃若補爲全目。以成完書。願俟後之君子。

一是集所列條目。祇據刻本。就事論事。如此事可入德行。則入德行。可入文學。則入文學。餘皆倣此。乃有拘儒。欲指一事。槩以生平。至罪予論列不當者。請勿讀是書。

一是集事實。俱從刻本中。擇其言尤雅者。然後收錄。若未見刻本。雖有見聞。不敢妄列。昭其信也。

一是孝標之注世說。博引旁綜。所采書目。幾至一二百種。近日無書可攷。時賢履歷。徵據尤難。是集注內所載爵里。以及生平大略。俱不敢憚煩。廣爲蒐輯。若徧覓不得。甯使闕如。以俟後補。

一昭代右文。名賢輩出。嘉言懿行。固不勝收。而是書止據所見諸集輯成。覽者無罪其不廣也。凡我遠近諸名家。倘以全集見貽。自當細搜續輯。彙訂今世說補一書。務期蚤寄郵筒。庶免遺漏之慮。

一物力艱難。剗闕之資。全賴好事。倘有高賢。傾囊解囊。以助棗梨。則闡幽表微。爲德不淺。

一汪鈍翁太史。說鈴一書。詞旨雋永。妙並臨川。偶從吳江得見刻本。停舟借錄。約數十條。意在宏暢宗風。遂忘掠美之嫌。

一陸子麗京。向著西陵新語。因暮年寄跡方外。未有全書。令嗣冠周。手授稿本。是集採拾頗多。要非無據。

一汪太史舟次。林使君西仲。毛大令會侯。朱處士若始。一見是書。遂相欣賞。品題之下。閒有權衡。要歸至當。受益良多。

一丁儀部藥園。孫子宇台。張子祖望。毛子稚黃。陸子蘊思。諸子虎男。各出案頭新書。慨然借錄。淘金入冶。集翠成裘。良友佐理之功。自不可泯。

一方涓仁太史。貽書相告。期以史局事竣。或得乞假歸來。佐成快舉。今急欲出書。請政當世。不能久待。殊爲歉然。然來書有云。事取其核。義取其公。辭取其馴雅。三復佳言。故當不負良友。

一是書原與同人互相參訂。集中所載先君實行二條。皆同人從志傳採入。故名字稱謂。一從本文。非諱敢附於臨文不諱之義也。至暉平生。本無足錄。向承四方諸先生贈言。頗多獎借。同人卽爲節取一二。強列集中。實增愧惡。

今世說目錄

卷一

德行

卷二

言語 政事

卷三

文學 方正

卷四

雅量 識鑒 賞譽

卷五

品藻 規箴 捷悟 夙惠

卷六

今世說 目錄

今世說目錄

豪爽 容止 企羨 傷逝

卷七

棲逸 賢媛 術解 巧藝 寵禮 任誕

卷八

簡傲 排調 輕詆 假譎 汰侈 忿狷 尤悔 惑溺

今世說卷一

仁和王暉丹麓撰

德行

梁蒼巖教子弟家法醇謹。雖步履折旋進退。必合規矩。自理學經濟諸書外。稗官野史。都不令流覽。然必使涉獵詩詞。曰：所以發其興。觀羣怨。俾識古人。美人香草。皆有所寄托也。

梁名清標。字玉立。北直真定人。癸未進士。歷官尙書。篤學不倦。每退食。卽簾閣靜坐。嘯咏自娛。

孫鍾元甫踰弱冠。丁內外艱。率昆弟苦塊倚廬。閱六載如一日。居恆不爲嶄絕峭特之行。自公卿以逮布素。皆歡然誠信相接。如坐人春風中。

孫名奇逢。直隸永城人。年十七。舉于鄉。既乃屏棄不事。潛心濂洛諸儒之緒。家庭雍睦。如見三代氣象。避地蘇門。累徵不起。從游日衆。所居漸成邑聚。

徐敬菴少負至性。父死。豫章蒲伏數千里。求遺骸。閒關險阻。猛虎在前。初不色動。感父見夢。得死處。卒負骨以歸。

徐名旭齡。字元文。浙江錢塘人。讀書刻苦。毅然以古人自待。登乙未進士。歷官大中丞。

胡勵齋父患脾疾。日夜侍湯藥。衣不解帶。目不交睫。下至中囊廁脛。皆自滌之。及卒。三日勺水不入口。一

嘔吐血數升。遂以哀毀成疾。尋亦不祿。室無妾媵。橐無旨蓄。士論惜之。

胡名直。字保林。浙江仁和人。己丑進士。歷官右通政。性謙下。不以行能驕人。厚重不佻。終身無疾言遽色。

魏天民教子敬重師傅。飲食必親視。束脩金必至精者。嘗曰。人冀子孫賢。而不敬其師。猶欲養身而反損其衣食也。

魏名兆鳳。字聖期。江西寧都人。為人忠孝。嶽嶽多大節。

嚴顥亭以宏獎人倫為己任。凡詞場藝苑。苟擅一長。必傾心倒屣。不惜齒牙為游揚。時論其名。在三君八俊閒。

嚴名沆。字子餐。浙江餘杭人。乙未進士。歷官少司農。性坦易。接人處事。洞然無隱情。其牧已謙冲退約。雖踐九列。抑然如寒士。平時不至有聲色加人。雖家人婦子有過。微言相警。取善改而已。

黃庭表性落落。惟與人交。當生死患難。不肯轉目相背負。

黃名與堅。江南太倉人。童年穎悟。詩一目。文二三目。即記憶。三歲能識字。五歲能誦詩。八歲酷好唐人詩。錄小本攜出入。輒為蒙師所禁抑。十四歲。慨然有志于古學。欲徧讀周秦以下書。甫三年。讀周末諸子六朝以上者。幾盡。己亥成進士。後又中博學宏詞科。官翰林。

方穉官孝友性成。事父少傅公。服勤盡養。少傅嘗曰。是子先意承順。不愧古養志者已。少傅遇變閩中。乃盡粥田廬。迎柩以歸。少弟穉稷。偶隨之吳門。遭寒疾。舌苔厚幾寸許。穉官以帛裹指拭口中。四十日始愈。指為潰爛。

方名成鄉。浙江遂安人。少時夢入一山寺。有語之者曰。子宿世爲僧。名本祚。因自號本祚居士。祖直完。令壽寧。以循良著。父書田。歷官東閣大學士。身爲世胄。弱冠領郡庠。初不以貴介自矜。及子象瑛成進士。亦澹約如平時。手錄格言。以崇澹泊。遠權勢爲鑒誠。

黃仙裳幼赴童子試。爲州守陳澹仙所知。後陳官給事中。以事繫獄。貧甚。黃售其負郭田。得百金。盡以贈陳。與之同臥起。囹圄中。陳後得釋。兩人同出白門而去。陳歿後。黃赴桐鄉往弔之。至之日。正陳忌辰。舉聲哀號。感動行路。

黃名雲。江南泰州人。長身玉立。能詩文。善談論。負氣慷慨。

逢俗人。稍不合意。輒設罵之。人多日以爲狂。不敢近。

陳名素。字函白。浙江桐鄉人。甲戌進士。

泰州守田雪龕居官廉。黃仙裳與周旋。絕不干以私。後田落職在州。不得去。黃自汝寧歸。囊中僅有二十金。乃先至田寓。分其半以贈。後語人曰。是日吾先至家。則家中需金甚亟。不得分以贈田矣。

黃客汝寧。太守金公。爲黃舊好。贈貽極厚。時有別駕鄭君。所知客。多不能成行。黃一日徧召客。置酒高會。酒酣。以太守贈金。盡散諸客而去。故歸時止存二十金。其貧如故。人多笑之。黃不以屑意也。

田名作澤。字小宛。河南商邱人。

周櫟園在閩。有趙十五。陳叔度。皆工詩。沒不能葬。周出俸金。葬之西郊。題曰。詞人趙十五。陳叔度墓。寥落無所之之士。時漬酒其下。

周名亮工。字元亮。一字減齋。一稱櫟下先生。河南祥符人。中庚辰進士。累官少司農。方頤豐下。目光如電。材器揮霍。善經濟。喜議論。疾縫觀拘文吏。當大疑難。判斷生殺。神氣安閒。無不迎刃而解。性嚴岸。居官不肯假借官

裏人。願好嘉與後進。嘗置一簿坐上。與客言海內人才某某。輒疏記之。宦轍所至。山陬海澨。有以讀書能為文名者。必在車騎過之。有可致者。即為拂席開閣。或又令進其所知。使耳目間不遺一士。然後快。得一善。力抽揚之。惟恐不及。雖少年一才一藝。不惜齒牙出其名字。老生贊交。相依如兄弟。有著作不顯者。務表章之。不遺餘力。尤嗜繪事。及古篆籀法。每天明盪漱出外舍。從容談說古今圖史書畫。方名彝器。皆條分節解。盡其指趣。客退。則手一卷。燈熒熒然。至夜分歸寢。以為常。著述多至數十種。

趙名璧。陳名鴻。

俱福建侯官人。

毛大可游靖江當墟馮氏者。悅其詞。欲私就之。毛謝曰。彼美不知我。直以我為狂夫也。徑去。

毛名奇齡。一名姓。字齊子。浙江蕭山人。官翰林。少與兄萬。並知名。人呼小毛子。性恢奇。負才任達。與人坦然無所忤。賢者多愛其才。暱就之。善詩歌樂府填詞。所為大率托之美人香草。以寫其騷激之意。纏綿綺麗。按節而歌。能吹簫度曲。

計甫草客鄴城。徧詢謝茂秦葬處。得之南門外二十里。見小冢頽墮荒草中。為賦詩弔之。求其子孫不可得。因固請鄴中當事。為封土三尺餘。禁里人樵牧其上。立碣誌之。曰。明詩人謝茂秦墓。

計名東。江南吳江人。丁酉孝廉。忍辱好奇計。勃勃有飛揚之氣。負經世才。常自比王猛馬周。

王介人與郡司李巖方公善。王無子。巖贈之妾。妾故有夫。兵驅散後。訪至王所。王哀憐。立還妾。重妻其夫。

王名翹。浙江嘉興人。少失學。論孟不卒讀。識字而已。弱冠偶覽琵琶傳奇。欣然會意。曰。此無難。吾亦能之。即據案唔唔學填詞。竟合調。自後學不少懈。乃工詞曲。又進工詩。家故貧。自攻詩。貧益甚。居室如斗大。一長鬚候門。婢汲漿。婦執爨給饔飧。王樹膝苦吟。落落不問家。人產。好奇計。多大言。遇知己岸幘抵掌。談論不休。

嚴名正矩。一稱絮庵。湖廣孝感人。癸未進士。歷官侍郎。霞奔玉暎。關六鈴推為絕席之雄。

荆元初爲丹陽巨族。族之人推元初爲詞正。每春秋時享。庀俎豆。省牲牽。率羣從子姓。執籩裸獻。不以年至爲讓。不以寒暑爲解。祀畢。手料簡酒肉。序列長幼。飲三行。顧視同坐諸老人曰。吾族大子弟數犯法。不可以無教令。乃書二簿。明徵其善否。召不率教者前。責之曰。某年月日。以某事應適罰。雖甚頑梗。若撻於市。無所容。退而相戒莫敢犯。一郡之人咸稱其宗法。

荆名文端。字肅之。江南丹陽人。嘗官鴻臚。輒與職家居。以孝悌聞。先人資產。推其上腴。以與仲叔二弟。仲蚤亡。子幼。荆成就之。訖於舉進士。爲人強力任事。醇謹篤誠。性方嚴。寡言笑。不妄交與。好面折人之過。其中寬然長者也。輕財好施。見孤殘窮餓者。傾囊棄毀質劑。無幾徵德色。君子謂其處己也惠而勤。其教人也肅而寬。其事先也敬而有禮。後以子廷實貴。封兵部主事。

毛太素督修秋租田戶以稗溼充數太素置不復問或詰之乃惻然曰田戶力田作苦尙不能飽妻孥吾姑譬之鼠雀耗耳比至歲視頗不能自給勿顧也。

毛名之履。字爾旋。浙江遂安人。嗜學。積書數千卷。丹黃皆遍。爲文奇肆自姿。不名一體。應舉幾得復失。遂絕意仕進。日課子爲文。其子際可。年十九。赴省試。太素嘆曰。孺子文。他日必能榮世。然以汝文爲佳。則雅非吾意。若使汝改轍從我。恐誤汝生平。汝就所能勉之。吾不復閱汝文矣。際可中戊戌進士。果以文稱於天下。

王慕吉喪父負土成墳居廬不出服闋食貧自守有非意加之者處之歸然不以一言較臧否。

王名範。字君慶。一字心矩。四川成都人。肆力經史。工詩古文詞。辛未成進士。筮丹陽縣令。治漕有功。擢御史。會遭母艱。時已大亂。遂移家入吳。丹陽之人聞其至。爭願割田宅授之。謝弗受。東阡西陌。與父老過存。見者初不知爲舊令也。子擔四。名于蕃。官司李。

田髡淵少時名善屬文陳黃門謂夏考功此子才氣卓犖他日必成偉器後黃門歿子幼貧慕傍荒田數

十畝髡淵代內官租二十年。復與友人梓其遺集。謂客曰。無以償黃門大德。生平每以爲愧。

田名茂遇。江南華亭人。戊子孝廉。才辨器識。絕出流輩。讀書穿穴經傳。落筆爲詩。歌古文。袞袞不能自休。與人交好。傾身爲之。盡窮達盛衰。誓不得而移也。

田髡淵妻孥終歲布衣糲食。客到治具甚盛。留累月不厭。後進生以詩文就正。有小好。必極口稱許。世謂髡淵家貧而能好客。才富而能好善。

蕭孟昉性慷慨。不佞施予。嘗蠲田穀數千石。具饗殮以活獄囚。又爲逋賦者完室家。贖子女。其好義如此。

蕭名伯升。江西太和人。豪談自喜。意氣卓犖。交遊滿天下。

沈臨秋爲節母。求海內詩文。得數百篇。置篋中。遇盜失之。沈號哭道中。七日不去。時佘山寺老僧晨起。見供桌有一卷書。封識甚密。署曰。煩上人親致沈孝子。沈遂得之。

沈名泓。江南華亭人。癸未進士。

王瑞虹初聚族居長版巷。一夕盜入其室。無所獲。遂縱火。時火猝起。人又畏盜。皆屏跡不敢前。祖母沈年髦不能避。陷烟焰中。徑路且絕。王挺身投焰負之出。毛髮爲焦。兩得無恙。人咸異之。

王名湛。字澄之。浙江錢塘人。少負至性。端重不佻。及壯。狀貌奇偉。長七尺有餘。雙眸爛然。美髯如畫。平生自奉甚約。賓客過從。則牽衣投轄。窮日夕不厭。一以坦衷待人。出言洞見肝膈。嘗面折人過。人不加恨。而多敬畏之。有告之以過。亦必欣然改容謝。與人期。終始不爽。視人事如己事。爲之規畫經理。必竭其智力而後止。

包驚幾篤於友誼。與吳東湖善。吳卒。撫其家甚至。後方嫁女。聞吳女將適人。貧不能理裝。卽以其女之奩。

具贈之。己女後一載始嫁。時論稱之。

包名捷。江南吳江人。有才名。與弟振。同事。壬午南闈。時稱二包。子咸。亦舉壬子孝廉。

毛繼齋嘗過一責家。其人設食坐。毛身出外。酤頃之。婦薄帷與毛通語。毛驚而去。遂棄債不復往。

毛名應鑄。字叔成。浙江杭州人。

姜子翥被難繫獄。願與治力營救不能出。除夕遣甥梁爾礪同囚守歲。久始得雪。

顧名夢遊。江南江寧人。性嚴介。恥干進。困省試數十年。以次舉明經。應得仕。棄去。故交顯者。數強起。卒以病辭。任俠恤死友。嘗與莆田宋比玉善。比玉歿十餘年。與治走鬪哭。伐石哀慕。南州蘇武子古文。歿。與治鑄之板行世。武子以有聞。北平于司直。好奇結客遊秦淮。死無恤者。與治含殮理喪。即又板其文傳司直。費考功筆山罷官。貧不歸石阡。分宅居之。歿葬顧氏塋傍。歲時祭。始築山令福清。稿佚。遠求得之。行世。又周旋繆賡公難。幾株及。賡公寂。蒐其遺左雜詠存之。其高致類此。梁亦慷慨有至性。多類與治。

姜名鶴儕。江南鎮江人。

陸麗京學既淵茂。立志以忠誠自勸。有人屬書郵寄者。務令必達。且終身未嘗私扣一兩。時人比之阮長之不侮閭室。

陸名圻。一字景宣。浙江杭州人。文行彪炳一時。事親至孝。居喪執禮。人擬之高子臯。

趙希乾年十七。母病甚。割心以食母。既剖胸。心不可得。則叩腸而截之。母子俱無恙。其後胸肉合。腸不得入。糞穢從胸閒出。穀道遂閉。飲食男女如平人。

趙·江西南豐人。至性純篤。粥粥如不出諸口。舉乙酉明經。以母老不仕。隱于星技。

李叔範初讀書。及兄叔則補諸生有名。叔範遂讓長兄。使專治經史。而身任經營內外。已承父命使分產。叔範意遂巡不忍答。輒曰。有長兄在。凡田宅俱請受其下者。叔則亦曰。吾家一區一廛。並吾弟所益。吾當受其下者。兄弟交讓不置。里中聞者競嗟嘆。至以名呼曰。李氏兄可爲模。弟可爲楷。一時傳爲嘉言。

叔則·名士楷·叔範名士楷·浙江鄞縣人。

沈去矜爲人孝友。父歿。毀瘠嘔血。東鄉盜起。焚其堂。堂本分居。屬兩兄。既燼。去矜卽割己宅居之。久之。兩兄欲徙去。去矜念兄貧苦。僦屋固留以讓兄。

沈名謙·浙江仁和人。少穎慧。六歲能辨四聲。益長篤學。尤好爲詩古文。嘗自言著作須手定自刻。庶保垂遠。若以俟子孫。恐故紙斤不足當二分直也。僻處杭之東偏。聲名籍籍。吳越齊楚之士。過鼓邨。車轍恆滿。

孫無言居廣陵。以能詩聞。布衣之士有工一詩擅一技者。莫不折節下之。其少舊通籍。自方伯郡守以下。或招之亦不往。南洲王于一客死武林。無言爲之奔告故人。經營其喪。紀其妻子。俾歸葬于南昌。

孫名默·江南休寧人。性瀟灑絕俗。志欲歸隱黃山。累年未遂。四方賢士大夫。作詩文送者。以千百計。

唐容齋有母喪。會賊入邑中。殺長吏。吳人死者相枕籍。唐緘麻直杖。臥於喪側。賊逐之。環棺三匝。且泣且罵。賊以刀斫唐。弗中。中几。裂刀亦寸寸斷。賊相顧驚怪。稍稍引去。自是遂相誠無敢入唐孝子門。

唐幼而好學。顧有清羸之疾。父憐之。誠勿過自苦。唐不敢傷父意。乃夜引燈帳中。臥覽而默疏之。質明視。視席間血絲如絡。文以大家爲宗。每一篇出。見者以爲王唐復起。治家尙儉。食無兼豆。而雅好賓客。烏展到門。歡然握手。

·袒裼呼盧·夢橫月落·與人交不佞然諾·人有婚喪之謂·未嘗以無爲解·有古俠烈丈夫之風·

陳際叔葬父拮据營辦頗竭資財發穴得舊棺急掩之曰冥漠君不安卽親靈未妥也仍厚禮葬師而遣之。

陳名廷會·一字瞻雲·浙江杭州人·生有至性·居父喪斷去酒肉·儼然骨立·乃以質教授河渚間·且夕哀號·涕零枕席·聞者爲之酸感·

姜桐音歷世仕宦而無贏筭然性喜中友之急山陰徐伯調家被賊賊質其子男而要之贖徐不能姜卸婦頭上粧贖之。

姜名廷梧·浙江會稽人·大司農一洪仲子·幼給捷·行文不起草·口所誦·卽成句·論者謂其詩類何景明·近爲詩者莫過也·婦祁氏·名巖英·忠敏公長女·賢有文章·每與姜倡和·或姜遠游·則必詒詩相問訊·有靜好集·徐名誠喜·出遊所至·飭厨傳·爭相爲歡·四方請教·日益輻輳·第簡傲·未能委曲隨·世低昂·韋布軒冕·相形轉厲·每見之詩文·以寓惋愴·以故人多媚之·閉有困者·

沈甸華聞人有過輒自警曰吾得毋有是亦以此訓其子弟又嘗言人多讀書則識進且能自見瑕疵故終身都無足處。

沈名蘭先·浙江錢塘人·

王丹麓遭外艱喪葬盡禮銜恤震涕風雪中重趺遠涉徧告當世鉅公乞爲志傳成帙曰幽光集士大夫讀而悲之。

王名暉·一字木庵·浙江錢塘人·好坐溪上聽松·自稱松溪子·見者稱爲松溪主人·喜讀書·所交多一時賢豪長者·遇同好·輒談論移日·或至信宿不厭·其他雖相對終日·卒不妄交一言·匪類故多恨之·平生重然諾·與人期·或允

所謂不爽時刻。性不耐飲。復善愁。凡在六合之內。或有才士。遭窮。佳人失所。每聞其事。輒爲於邑。甚至累日減食。終身不見有喜色。

孫幼闇少貧。訓童子學。拳拳忘勞。有不率教。則撻之。亦自悔罵流涕。朱近脩嘆曰。孫郎審有氣人。遂相攜。徧交邑之諸名士。由是著名。

孫名宏。浙江海寧人。幼孤貧。奉母氏依外家。張遂名張孫宏。貌古質弱。性落拓。喜飲酒奕棋。醉後叫呼。胸氣益急。里社高會。邀之飲。且英。諸名士知其好勝。故困之。飲突連負。悶悶不能發舒。抱木柱摩其腹。諸名士相挪揄。以爲樂。壬午舉于鄉。已就選。

得宜平教諭。未幾卒于官。
朱名一。一稱欠菴。浙江海寧人。壬午孝廉。才以無所不有爲大。文以隨感而肖爲工。抱經綸之宏略。少不見用於時。中歲輒自放廢。與方外縉紳爲侶。徒以著作送老。當世惜之。

呂翼令在白下聞父喪。跟踰就道。衝雪兼程。遂廢眠食。比歸。一慟幾殞。勺水不入口者五日。杖而強起。書。藜莪詩懸之座側。三復流涕。論者謂呂不廢藜莪。正與王哀事異而情實同。

呂名律。浙江仁和人。事父母篤孝。年已強壯。孺慕不衰。執親喪一遵禮制。寢處苦塊。蔬食三年。親朋好會。概辭勿與。每遇忌辰。身服縞素。不御酒肉。不苟言笑。涕淚終日。

袁重其狀貌。擢然能讀書識字。好以禮義自維。不苟言笑。與四方賢士大夫交。言而有信。鄉里交嘆爲善人。

袁名駿。江南吳縣人。三歲而孤。母苦節垂六十年。駿日走四方。乞當世賢士大夫詩文。以頌母。每歸莊。誦母傍。擊出金石。歲葺一卷裝。綴之。積五十餘軸。陳徵君眉公。首題其幀曰。霜哺篇。海虞錢宗伯。亦爲作識字行一章。其詞曰。母能識節字。兒能識孝字。人生識字只兩箇。何用三倉四部盈箱笥。世之人遂無不知有袁孝子者。

包飲和授書里閭。身無私錢。比歲懷授書金。踞其父慙獻之。獨一歲踞。赧然不起。良久曰。兒於中擅取數

緝矣。偵之周甲貧也。又一歲復然。易書也。其謹如此。

包名秉德。一字即山。浙江蕭山人。著述自豪。出處不苟。嘗與同邑崇儒里沈七禹錫。城南蔡五十一仲光。城東里毛姓。為四友。

閔象南老好觀書。年七十餘。每夜漏下二三十籌。手不釋卷。嘗自抄錄古人格言於壁。以自勉。訓子孫。所坐臥小室。人每勸撤材新之。象南曰。視吾不蔽風雨時何如。且久與之習。如故人不忍棄也。

閔名世璋。江南歙縣人。外祖家四棺未葬。出三十金一日盡葬之。嘗渡江謁九華山。見下河饑民。蜂屯江口。乃稅駕避風館。買米三日。賑之而去。又王喜鳳被誣。逮於法。以十二歲女質人。金如其歲。嘗救得活。女思母病欲死。母曰。女死吾不獨生矣。象南捐十二金贖還之。母女皆獲全。其他懿行。詳魏冰叔善德紀聞錄。

今世說卷二

言語

蔣虎臣與王阮亭談。所謂遇鍾離意。譬效俱成丹砂。

蔣名超。江南金壇人。丁亥進士。官翰林。風流儒雅。宋既庭稱其修潔如處子。澹蕩如道人。恬退如後門寒素。

王名士麟。字貽上。山東新城人。生有異質。弱不好弄。日誦習數千言。語必驚人。舉乙未進士。官戶部。上廉其才。改授翰林。

魏環極言薄於朋友者。薄親戚之漸也。薄於鄉黨者。薄宗族之漸也。

魏名象樞。一稱庸齋。山西蔚州人。丙戌進士。官都憲。性至孝。持正清挺。以言事忤旨。左遷光祿丞。補官即請終養。都亭帳飲。丁祠部以詩送之。乞黃精數斗以貽母。里居後不復通書朝士。或以著述寓汪鈍翁。惟用方幅楮。題姓名其上而已。其耿介如此。

尋復召用。歷官尙書。

周櫟園偕馮伯宗過劍津西山。有竹數頃。丹如火齊。笑曰。乃知此君亦戲著緋。

施愚山語所親曰。我輩既知學道。自無大戾名教。但終日不見己過。便絕聖賢之路。終日喜言人過。便傷天地之和。

施名聞章。字尙白。江南宣城人。己丑進士。官侍講。性本忠愛。義篤友朋。操履孤遠。學有本原。力以名教爲己任。嘗講學湖西。羣父老子弟。環而聽者輒數千人。聞孝弟忠信禮讓之言。往往至於泣下。當世推論文章理學。莫不以

宛陵爲歸。

客指燕地蒲桃。問汪鈍翁。吳中何以敵此。汪答曰。橘柚秋黃。楊梅夏紫。言之已使津液橫流。何況身親剖摘。

汪名堯。字若文。江南長洲人。讀書勵志行。內自重。有守。又善彙記。過日終身不忘。舉乙未進士。官戶部。浮沈郎署。位不副志。發爲著作。原本經術。晚築室堯峯之麓。幅巾杖履。與山樵野叟。行歌互答。當道大吏。求一見不可得也。嘗語人云。士大夫行己不可無本末。讀書不可無師承。立論不可無依據。會詔舉博學宏詞。公卿交薦。遂考授翰林。

宋荔裳黃西樵曹顧菴同客湖上一夕看演邯鄲盧生事。酣飲達旦。曹曰。吾輩百年閒。入夢出夢之境。一

且縮之銀鏡檀板中。可笑亦可涕也。

宋名琬。字玉叔。山東萊陽人。丁亥進士。歷官廉使。所至輒有能聲。數遭困阨。意氣自如。揮毫高視。不覺更有旁人。

王名士祿。字子底。山東新城人。壬辰進士。官司勳。眉宇朗秀。襟懷伉爽。爲人望所屬。撰然脂集。攬擷古今閩秀文章。至百六十卷。又撰閩中遺事。爲朱鳥逸史六十餘卷。

曹名爾堪。字子顧。浙江嘉善人。十歲能屬文。十二歲善詩詞。時人擬之聖童。壬辰登進士第。累官侍講學士。淹博多識。掌故。又工強記。所過山川阨塞。無不指畫形勢。士大夫一與之游。積久不忘。無貴賤。具能識其名氏爵里家世之。爲文敏給博麗。兼長衆體。閣試兩稱最。同館皆遜服之。

徐竹逸喪子。客有議之者曰。徐君必有隱惡。故罰及其子。竹逸聞之曰。昔仲尼有何隱惡。而伯魚歿乎。客聞而謝之。

徐名階鳳。江南宜興人。戊戌進士。官司李。少負軼才。凌厲矯亢。慨然以古作者自命。與人交諄誠懇。動出肺腑相示。

徐名階鳳。江南宜興人。戊戌進士。官司李。少負軼才。凌厲矯亢。慨然以古作者自命。與人交諄誠懇。動出肺腑相示。

滬上校書玉烟。慧甚。善行酒。凡飲席必來典觴。且能使意之所屬。曲爲照顧。令不苦飲。張宏軒嘗曰。如玉烟者。可稱傾城悅名士矣。

張名錫。字悅九。江南華亭人。乙未進士官刺史。

毛大可自言。生平可幸者三。一。行文無宋人論習。二。無負郭田。作衣租食稅男兒。三。不爲繼子。慈孝兩隔。王瑞虹杜門謝客。不與外事。好閱通鑿綱目諸書。熟悉古今成敗利害。嘗誨其子暉曰。丈夫處世。固不當爲賢士大夫所棄。亦不當爲庸衆人所容。時嘆爲名言。

衛澹足云。與丹麓處。如澹對黃花。使人幽賞。

衛名貞元。山西陽城人。丙戌進士官御史。

毛會侯自言。一夕得霞舉堂諸刻。如饑猿探果。不能自定。

毛名際可。一字鶴舫。負才雋異。淹雅博聞。胸次瀟灑。虛懷善下。文極工妙。有刻意彈射者。輒欲下拜。至與友朋往還。必以無所規益相督。官轍所至。著聲績。爲羣吏冠。

霞舉堂。王丹麓讀書處也。刻有南窗文略八卷。松溪漫興十卷。峽流詞三卷。尺牘二卷。雜著十種。木菴外編二種。遂生集十二卷。幽光集二卷。贈言兩集。文津二卷。

徐仲光曰。吾儕如鳥中子規。自是天地閒愁種。

徐名芳。江西南城人。庚辰進士。

袁蔞菴云。名譽人之賊也。安逸道之賊也。聰明詩之賊也。爽快文之賊也。

袁名于令·字令昭·江
南吳縣人·官荊州守·

王于一問杜于皇窮愁何似往日杜云往日之窮以不舉火爲奇近日之窮以舉火爲奇

王名猷定·江西南昌人·太僕止敬子也·遭亂居廣陵·窮愁著書·力追大雅·海內能文之士·羣翕然推之·容死西湖·篇帙散失·大梁周司農·爲輯其遺稿·刻行於世·書法亦遒勁·有晉人風度·
杜名濬·一稱茶村·
湖廣黃岡人·

杜于皇刻已集才及數篇手之而笑或問何笑杜曰昔范詹事自贊其後漢書爲天下奇作吾嘗笑之今
吾意中之言彷彿詹事吾恐後之人又將笑吾是以先自笑也

申鼻盟曰靜坐自無妄爲讀書卽是立德

申名涵光·一字和孟·直隸永年人·父端愨公·盡節·後以
理學訓其兩弟·皆能立身揚名·觀仲名涵煜·隨叔名涵暉·

寧都三魏或比之眉山三蘇氏魏笑謝曰人各自成其我雖兄弟至親不期相類何事高擬以辱古人

魏氏三子·皆徵君天民子·長曰祥·一名際瑞·字善伯·是爲伯子·次曰禧·字冰叔·曰禮·字和公·是爲叔子·季
子三子·平日以父爲師·兄弟相爲朋友·四方及鄉里之賢者·三子莫不折節請受其益·或講求天下古今之故·或窮聖
賢之理義·或談論詩賦文章·皆欲究得所以然者·伯子季子·閱歷十二國·所經恆數萬里·其
于世務人情·多所諳識·叔季二子·所交奇偉蘊抱之士·視伯子爲至多·各有文集十數卷行世·

涂子山守貧不務苟得所與游少當意者以是得狂名魏冰叔嘆曰人言子山狂人自不狂耳

涂名酉·江西新城人·好爲詩古文辭·有名于時·爲人短小·胸無鱗甲·性率易近人·及考古義·與人爭魚
魯·則疾聲搖頭不自止·當無聊時·往往高誦其得意句·醉則抵掌掀髯·搔耳頓足·隱然有不可一世之意·

宋去損精八分書高雲客以爲學從祖比玉宋云僕固不厭家鷄然何至舍古樨今

宋名祖謙。比玉名。
珩。福建莆田人。

高名兆。福建侯官人。淑身修行。抗志懷古。淮南陶季深。稱其蕭然窮巷。俗士曾不得至其門。五父之衢。亦無能尋其履屐之迹。

吳介茲。客山陰時。念林鐵崖。去住未定。但覺千巖競愁。萬壑爭淚。

吳名晉。江

南江寧人。

林名嗣環。福建晉江人。己丑進士。官觀察。倡議屯田。爲武臣所中。被逮。久得雪。寓居湖上。以著述自娛。無歸志。卒以客死。

或問陸麗京諸賢雅負經世。吳司李治姑蘇。何以都不稱。陸云。平子事蹟不逮。無損名士。

吳錦燮。官蘇州司李。

陸麗京嘗遭危疾。宛轉牀第閒。猶喜滑稽。一夕向陳際叔曰。奈何歲在龍蛇。陳慰之曰。正恐吳中高士。陸後竟起。

或問計甫草。暇日何以自娛。計云。賦詩彈碁。俱增惡業。但能日誦楞嚴經兩卷。便足了一生事。林鹿菴好客。雖處憂勞。況瘁中。遇良友至。則大喜。嘗謂人曰。友者。儉歲之梁肉。寒年之織纈也。

林名璐。字玉達。浙江錢塘人。峻潔自好。環堵蕭然。篤學工文章。時或中酒興來。輒瞪目箕踞。議論排突。不復知行坐人。

毛稚黃負才善病。六載起處。不離牀榻。人以爲憂。毛自若曰。病味頗亦佳。第不堪爲躁熱人道耳。

毛名先舒。一名驥。字馳黃。浙江仁和人。澹泊寧靜。不求聞達。以古學振起西陵。天下士翕然稱之。

毛稚黃欲賣田刻集意猶未決。諸虎男曰：產去則免役，紙貴可以操贏，是有兩得無兩失也。毛笑頷之。

諸名匡鼎。爲駿男弟。浙江錢塘人。並有令聞。時人方之機雲軾轍。

許彝千嘗登語溪大橋，目城中青楓歷歷，嘆曰：此樹不知歷幾興亡。

許名先甲。浙江杭州人。

陸蘊思云：子弟能讀書，不患不佳，不宜專習帖括。若者雖榮，終非俊物。

陸名進。浙江仁和人。才情敏給。議論風生。同人譙會。蘊思不與。舉坐爲之不歡。

徐敬輿嘗誤金盡裘敝，爲裘盡金敝，座客笑之。徐曰：皮之不存，毛將焉附。非裘盡乎？何意百鍊剛，化爲繞

指柔，非金敝乎？客無以難。

徐名敬直。浙江仁和人。

沈稽中父君化，有怨家詣軍門，誣以大逆，遣吏捕。時方治反獄，誅殺日數十百人。吏到門，舉家惶懼。稽中挺身出曰：我卽君化也。訊時顏狀不變，詞理條暢，竟得釋。君化嘆曰：兒之身，我生之；自今日以往，我之身，乃兒生之。

稽中名備。江南青浦人。論尙書甚精。有尙書說行世。

政事

王阮亭爲揚州法曹。地殷務劇。賓客日進。早起坐堂皇。目覽文書。口決訊報。呼晷之聲。沸耳。案牘成於手中。已放衙。召客刻燭賦詩。清言霏霏不絕。坐客見而詫曰。王公眞天才也。

龔芝麓拜御史大夫。抗疏每言時政得失。迨決獄。日必平反數十事。事雖奏當。有毫髮疑。必推駁至盡。至輟匕箸。展轉含毫。獲有生機後已。同事或期期不可。必動色力爭。至再三不厭。

龔名鼎孳。字孝升。生時庭產紫芝。因號芝麓。江南合肥人。甲戌進士。歷官大宗伯。天材宏肆。數千言可立就。詞藻繽紛。都不點竄。爲孝陵所識賞。嘗在禁中嘆曰。龔某眞才子也。酒餘。好即席限韻。擊鉢瀟翰。工麗絕倫。尤好汲引善類。獎借後進。學者仰之如山斗。

周櫟園按察入閩時。值寇警。所在城堡。常四面火起。鉦鼓聲動地。周指揮鹵楯。蘭石渠答。施設有序。手發大黃。應弦殪敵。長嘯若神人。

史立菴爲少宗伯時。同官議裁孝子節婦廩給。曰。彼自分內事。何與朝廷。史曰。爲子不孝。爲婦不節。亦何與朝廷。必以法繩之耶。議遂寢。

史名大成。字及超。浙江鄞縣人。乙未狀元及第。歷官侍郎。性至孝。以母病。陳情終養。爲當事所格。曰。吾豈以一官易一日之養乎。遂家居十年。例應削籍。後遇赦得免。

姜定菴爲温州教。攝瑞安縣事。適寇至。時寇輕瑞安。用少嘗之。姜帥鎮兵之守門者數十人。驟殺而出。賊遁後又大至。姜乃斂民家醕甌凡百餘。丹紙泥其唇。以唇四嚮架陣間。賊望見甌。驚以爲列礮。不敢近。

姜名希轍。浙江會稽人。累葉承華。蚤馳駿譽。壬午舉孝廉。歷官京兆。爲人敦朴達權。和易凝直。名業冠於一時。

林西仲出理徽州時。有府吏耑寵稔惡。林廉得其蹟。逮至欲杖斃之。吏呼曰。小人罪固當死。但以不能改過遷善。賈恨泉下耳。遂釋之。後吏以善稱於時。及林罷去。泣於道左曰。非公之嚴。我竟以爲惡生。非公之寬。我竟以爲惡死。聞者咸異其言。

林名雲銘。福建閩縣人。弱冠舉于鄉。戊戌成進士。理徽九載。多異政。奉裁歸里。著作益饒。吳方漣侍御。見所注莊子。因歎爲標旨清殊。迴絕羣議。

顧且菴官侍御。彈劾不避權貴。然卒無妄言。嘗曰。言而當。足以裨國。是言之不當。雖天子不以爲罪。使異日輕諫官。非計一時朝野以爲得人。

顧名豹文。字李蔚。浙江錢塘人。乙未進士。

相州許西山作鹽官。令政尙清峻。修教令。飭廉隅。禁頑暴。民不敢犯。邑固濱海。一日驚傳海水且大上。居人洶怖反走。許下禁令。刑白馬於神。爲文詛之。及昉。怒潮退舍四十里。沙磧復爲平壤。

許名三禮。河南安陽人。辛丑進士。知海寧。

嵇叔子治杭州。事無巨細。皆委曲周詳。夜以繼日。不以爲勞。郡有好古樂道之士。必折柬招之。不至。雖在蓬華。親造訪焉。

嵇名宗孟。江南山陽人。丙子孝廉。美鬚髯。眉閒一尺。居官清介。張鞠存吏部。嘗過署中。見其四壁蕭然數椽。不蔽風雨。案牘筆墨。與泥塗相揉雜。却鮪鱸魚。一埤交謫。殆有中人之產所不能堪者。

周釜山守栝三年。行廉政。清士民化之。有篙工拾遺犀一簏。不忍取。白府以歸遺者。

周名茂源·字宿來·江南華亭人·己丑進士·官比部郎·比部爲王李諸公舊遊·當時所稱白雲樓詩·即其地也·周與同官宋直方·施愚山·時相過從·飲酒賦詩爲樂·雖大風雪弗輟·一時都下盛傳·謂復見先輩風流·田守栢州·爲治不尙威嚴·栢人歌思之·

胡勵齋以詞臣備兵常鎮·時鎮多黠盜·每擒治一人·輒株連百餘家·捕使按籍鉤索·胡毅然爭曰·鼠輩特欲緩須臾死·害及無辜·庸可信乎·使者數至·數不與·復正色曰·殺人媚人·吾不爲也·何惜一官·爲數百人請命耶·卒力白之·

毛會侯宰城固·多異政·邑人梁樟·爲折尾虎所攫·毛爲文禱於神·果獲之·人謂不減昌黎驅鱗·

荆涇野令歸安·內行修潔·輔以精敏·羨餘無所取·請托無所受·舉邑中數十年之敝政·一舉而更張之·有數掾吏·乾沒爲姦·荆廉得實·立收案·致法·士民戴若父母·

荆名彥·起家進士·陝西涇陽人·

郭鳴上策仕·授崑山縣令·縣故劇難治·吏人且多豪猾·郭赴官·未至縣五百里·吏人十數輩迎於道·乃詐稱疾不起·自懷部牒·閒道行一晝夜·抵縣·守縣吏方會飲堂廡·見一老書生·儀狀樸野·直上堂踞坐·皆大怒·叱逐之·不肯去·視其手中所持·若文書狀·迫視之·則部給崑山知縣牒也·大驚·互相推擠·仆堂下·前迎令者·怪疾久不出·伺得其故·亦馳歸·適至·共叩頭請死罪·郭笑遣之·吏愈恐·不肯起·乃諭之曰·若所爲·我盡知之·今爲若計·欲舞文亂法·快意一時·而身陷刑戮乎·欲守公奉法·飽食煖衣·與妻子處乎·皆曰·欲飽

媛守妻子耳。曰：果爾，我今貸若罪。後有犯者，殺無赦。吏皆涕泣悔悟，終郭任無犯法者。

郭名文雄。山西介休人。年四十。以諸生貢入京師。得授是官。尋卒。吏民聚哭於庭。闕縣皆罷市往弔。發其家。敝衣數事而已。無子。喪不能歸。縣人共買地葬於馬鞍山。更立祠其旁。歲時祀焉。葬之日。他邑來會者。數萬人。吏民哭之。如其私親。

李公望爲廣陵訓導。郡中知名士。必親造焉。嘗曰：昔陳仲舉遷豫章。至便問徐孺子所在。吾每想慕其風。惜廣文寒糞不足道也。

李名公渭。江南興化人。郡守蕭五雲喜其才。稱爲昭陽博士。

董巽峯令襄陽。期年。政教大洽。襄民甚戴之。會王師征湖南。先後且數萬。至芻糧勿備。諸大吏以爲憂。董獨匹馬入鄉。告百姓以故。百姓轉相傳告曰：事且急。奈何累我父母爲。遂大供車牛。小供芻豆。輓負不絕於道。三日而畢。軍輸以饒。諸大吏驚服以爲能。

董名上治。字智甫。江南武進人。丁亥進士。累官水部。少以理學經濟自任。得伊川考亭歎卻。旁瞻子史說集。凡天文地利河渠兵戰諸書。盡習之。爲人跋踈謹退不言。躬行風範凜然。

許彝千司訓桐鄉。時值盜警。城無守禦。邑令惶怖。許曰：是可先聲奪之。命邑中火炬齊發。金鼓震撼。盜以有備駭去。邑令嘆曰：公此舉雖古曳柴增炬。剪楮削木。何以過是。

今世說卷三

文學

王敬哉爲禮部尙書。猶好學。寒宵擁爐篝鏡。呬唔不輟。諸公子環坐。聽其緒論。退而筆之。爲冬夜語兒箋。記時人見其書。以爲其體製覈而賅。其用心仁以恕。其立言皆可爲天下後世法。

王名崇簡。直隸宛平人。癸未進士。善自謙。下。崇厲名教。獎引後學。孜孜若弗及。

王阮亭于役淮陰。泊舟秦郵湖。風雪凝沍。凄然動心。秉燭作歲暮懷人詩六十首。夜漏未半。屬草都就。詞旨清麗。閒出奇峭語。茶村杜處士語人曰。使君才藻如許。當是天人。

程崑崙登焦山。披草搜廕。鶴銘遺蹟。爲衝波撼擊。缺蝕不完。別購善本。磨懸崖而刻之。拉阮亭同遊。相視叫絕。憑高弔古。各賦一章。紀其事。江干之人豔稱之。

程名康莊。山西武鄉人。大司空鳳菴孫也。名德博洽。爲時輩所推。蔣虎臣嘗評其文云。禰韓祖馬兒視樊。元孫劉。官鎮江通守。一時稱其廉平。

曹秋岳稱李天生長律詩云。風雅以來。僅有斯製。

曹名溶。字鑾躬。浙江嘉興人。丁丑進士。官侍郎。

李名因篤。一稱子德。陝西富平人。應薦博學宏詞。考授翰林。尋即辭去。

方渭仁少年負氣自豪。里中時有文會。每當同人搦管拈題。苦吟面壁。方與毛會侯。輒握手修篁怪石間。相與縱譚天下事。或誦近所為詩歌共賞。閒以諧謔。日向午猶不肯成一字。同人來相敦迫。方始振筆直書。濤怒雲舒。不可端倪。

方名象瑛。浙江遂安人。性簡重。天資穎異。年十餘時。即能操筆成詩。騷短賦。為鄉國豔傳。祖書田少傅。尤鍾愛。丁未成進士。益發憤讀書。日與同好。以文章相切劘。四方人士。翕然宗之。會廷試博學宏詞。選入翰林。

毛大可過海陵。至淮上。時吏部張翰存父子嗜詩。有名園。中秋夜會客數十人。伎樂合作。鼓吹竟夕。毛倚醉扣盤賦明河篇。凡六百餘言。及旦。淮上諸家傳寫殆徧。宣城施愚山還自京師。見之。目為才子。

張名新標。江南山陽人。己丑進士。官吏部。

宗定九稱汪舟次文理不謬。搖其枝。字不妄舒其藻。

宗名元鼎。一稱梅岑。江南江都人。恭謹朴雅。與人交終始無失。學有源本。旁搜子史六朝奇聞僻事。罔不手鈔心識。家苦貧。課一二老僕。耕廢田。春而食。析而爨。著書自娛。足不入州府。

汪名楫。一稱梅齋。江南休寧人。性伉直。意氣偉然。通達治亂。富於學問。文章翰墨妙天下。名公卿咸折節願交。己未召試。官翰林。

吳志伊酷耽文籍。綜博無遺。嘗與吳錦雯會飲馬鳴九許。錦雯問鄒殿二字何讀。志伊曰。殿也。同本秦權

古文。鄒許同本說文長箋。錦雯嘆服。

吳名任臣。浙江仁和人。志行端嚴。博學而思深。兼精天官奇壬之術。射事多中。時人比之管郭。薦舉博學宏詞。考授翰林。

錦嬰·名百朋·浙江杭州人·少奇敏·讀書五六行並下·操筆爲文·數千言立就·未曾起草·壬午舉于鄉·久乃謁選
·兩爲司李·都有異政·改令南和·尤得民心·病沒於官·百姓如喪考妣·哭奠者比肩接踵·紙錢騰價·一縣盡空·
東西各建祠祀之·兒童亦疊
瓦礫爲小屋·祠吳公云·

禦兒朱蠡斯誤娶同姓·後十年覺得·欲去其婦·友人曹射侯·陸麗京·憐其雅非同望·輕致唾井·作書勸之·
因疏古名儒取同姓事·會吳志伊後至·曰·王沈與王基聯姻·劉疇與劉嘏爲婚·世人無譏·緣非同原也·一
時服其敏覈·

曹名序·浙
江石門人·

吳錦雯博物洽聞·貫串經史·嘗與徐世巨輩·創爲恢麗瓌璋之文·天下誦之·號爲西陵體·陸麗京目之曰·
天下經綸徐世臣·天下青雲吳錦雯·

徐名繼·浙江仁和人·少擢茂才異等·舉明經·遭亂不仕·隱於竺乾山中·更名淨挺·
字儂亭·天性英爽·不耐憂煩·嘗謂人非金石·立見銷亡·不若逃形全真·肆志方外·

顧景范著方輿紀要成·吳撫軍先刻其五卷行世·孫宇台謂其書·若長河互天珠囊照地·古今興亡·天下
形勢·瞭如指掌·真人閒所未有·

顧名祖·禹·江南無錫人·沈敏有大略·爲人奇貧而廉介·寬厚樸摯·不求名於時·獨耽著述·凡山川險易·古今
用兵戰守攻取之宜·興亡成敗得失之迹·輯爲是書·約一百二十卷·論者謂九州記·一統志·諸書·不能及也·
吳名輿·字伯成·浙江山陰人·慷慨有才略·
·爲無錫令·政聲卓絕·由閩舉至閩撫軍·
孫名治·一稱鑾菴·浙江仁和人·
隱居教授·爲人倫所宗·

周櫟園觀察維揚。簿書稍暇。手一編不輟。卽參拜大僚。酬訪賓客。坐輿幙中。往來市肆雜沓。日以十數卷自隨。歸語友人。輒能舉其詳曲。雖甚久遠。偶晰一字之疑。引據證明。必指其出何書載何卷。以及行墨之次第。簡牘當命掌記。依檢應手而出。不差彙黍。

周櫟園少時讀書。恆以夜自更初至達旦。方一偃息。日則遊行登覽。常謂人曰。雲影天光。皆足亂人心志。作此等功業。須是一隙不露。乃可靜悟。

錢牧齋曰。沈留侯。藝林彙考。爲經籍之禁禦。文章之圃田。

錢名謙益。字受之。江南常熟人。庚戌進士。歷官尙書。目下十行。老而好學。每手一編。終日不倦。暑月夜讀苦蚊。輒以足置兩甕中。

沈名自南。一字恆齋。江南吳江人。珪璋特達。博通今古。登壬辰進士。爲山東蓬萊令。

楊以齋性樂閒適。不近囂埃。每讀莊子。輒以爲能移我情。

楊名雅建。字自西。浙江海寧人。乙未進士。歷官貴州撫軍。

宋旣庭謁龔芝麓於京師。一見歡甚。酒闌燈掩。相與分韻賦詩。龔才思敏捷。落筆如飛。望之若神仙中人。

宋名實穎。江南吳縣人。醇靜寡欲。動止皆有常則。才名蚤著。三十舉孝廉。以公車至京師。輒攝衣據諸貴人上坐。意氣岸然。絕無所顧讓。自名公卿訖四方遊士。慕之者無不日夜持謁到門。以望見顏色爲幸。

曹顧菴登南宮上第。宰相愛其門地才華。亟欲致之館閣。於時安邱孟縣兩館師。皆極天下之望。恆傾心下之。顧菴以文詞翺翔諸公遊士之間。每一揮毫。霞明玉映。諸翰林皆自以爲不及也。

王烟客插架千卷。皆丹黃勸讐。每當賓朋雜坐。舉史傳中一事。輒援据出入。穿穴舊聞。

王名時敏。江南太倉人。官奉常。

分湖葉元禮。爲鍾廣漢徵誅文。援筆作引。頗屬哀豔。李武曾曰。讀此如聞急風淒雨。令人益增鄰笛之悲。

葉名舒崇。江南吳江人。丙辰進士。

鍾名淵映。浙江嘉善人。

李名良年。浙江嘉興人。

江嘉興人。

林西仲少嗜學。每探索精思。竟日不食。暑月家僮具湯請浴。率和衣入盆。衣盡溼始覺。里人皆呼爲書癡。

陳椒峯讀書至夜分。兩眸欲闔如綫。輒用艾灼臂。久之成痂。每一顧。益自奮不敢怠。

陳名玉蕪。字廣明。江南武進人。少有大志。凡天文地誌。兵刑禮樂。河渠賦役諸大事。莫不講求爛熟。言之娓娓。賓客輻輳。應酬旁午。以至彈琴投壺嬉戲之樂。靡所不爲。偶有所觸。發爲詩文。旬日之間。動至盈尺。見者遜其俊才。比於劉穆之云。舉

丁未進士。官中書。

吳漢槎最耽書。一目數行。然短於視。每鼻端有墨。則是日讀書必數寸矣。同學以此驗其勤惰。

吳名兆。江南吳江人。性傲岸。不爲同里所喜。其友或規之。吳大言曰。安有名士而不簡貴者。

王西樵目錢礎日詩高朗者。嘗諸星緯。浩瀚者乃若江河。有目共見。終古如新。

錢名肅潤。江南無錫人。學博行方。嚴取予。重然諾。家居孝友。落落有古人之節。閉戶傳經。門下皆知名士。雅好述作。博綜今古。柏鄉魏相國。推其理學爲鄒魯干城。其論史諸文。以爲陳君舉。何去非。咸未逮也。

紀伯紫言人生有三大事性命經濟文章柏鄉一身巖然直任之矣

紀名映鍾一稱鸞

叟江南江寧人

魏貞菴名裔介字石生一稱崑林

直隸柏鄉人丙戌進士歷官太傅

嵇叔子爲李太虛作閨園影賦纍纍數千言編珠貫玉地負海涵刻畫都盡李攜示趙洞門李叔則各舌
橋不下

李名明睿江西南昌人壬戌進士歷官尙書
趙名開心湖廣長沙人甲戌進士歷官尙書

徐野君嗜山水遊輒有記嘗以示呂翼令呂曰數日目力之勞省却古人多少筍輿蠟屐

徐名士俊浙江杭州人少奇敏于書無所不讀發爲文跌宕自喜好爲樂府詩歌古文詞與人交如坐春風飲
醇酒有問字者傾心教之有一長可錄者不惜齒牙獎成之故所至逢迎恐後爭禮爲上賓日有課程雖老勿替

讀書無論卷葉多寡必自首至末以覽竟爲率五經歲讀一過有徐廣之風
曾遇異人魯雲陽授以導引法年近八十蒼髯丹脣顏面鮮澤如嬰兒

鄒程邨語言妙天下小詞單文令人色飛神豔

鄒名祇漢字訐士江南武進人戊戌進士天資穎異過目靡所遺忘上自經籍子史下逮藝文雜著旁及
天文宗教百家之書細至古今人爵里姓氏世次年譜無不悉記至性沈摯意氣真篤與人交久要不忘

鄒程邨讀書如漢主拔獵不至野盡山窮囊括其雌雄不止

惲正叔與鄒程邨同客湖上鄒向惲誦王丹麓不去口後惲數過王見其兀坐一室時時握管謄纂志在

千古歸與鄒言交嘆爲奇士

傳名格。一名壽平。江南武進人。
工詩文。通書法。畫尤絕倫。

王丹麓博學擅才藻。一時名聲滿江左。居北郭。爲往來舟車之衝。四方士大夫過武林者。必先造其廬。問字納交。停輒不忍去。

方涓仁嘗稱。松溪子爲人。著述名海內。而非聖之言不陳。交遊盡天下名流。未嘗向俗客一通姓字。

來元成遇未見之書。雖至典衣購之不吝。夜閱晝錄。必速終卷而後快。

來名集之。浙江蕭山人。生有異質。過目成誦。庚辰成進士。給事瓊閩。謝政後。日手一編。探索討論。得則豁然開朗。眉宇飛動。不得則憤悶累日。寢食俱廢。每有譚議。舉一事。必批根導源。窮詰流末。條條然如說家人事。如按驗官府文牘。如自訴肌膜所疴癢。如數壯貝。聽者輒爲爽然。

黃太冲家多藏書。裝本厚二寸。洒墨塗乙。參互散亂。人求不得。太冲獨省記之。季弟澤望。丹黃工緻。篇幅精整。訖一書。更一書品第。循環不輟。

太冲。名宗義。一稱梨洲。浙江餘姚人。父忠端公。死奄禍。太冲上書訟冤。聲振國門。年踰六十餘。尚嗜學不止。每寒夜身擁繡被。以雙足置土爐上。餘膏熒熒。執一卷危坐。晷月則以麻帷蔽體。置小燈帷外。翻書隔光。常至丙夜。所學上本五經。旁羅百氏。俱能探精攷微。得其本末。俾望。名宗會。善飲。磁榻瓦樽置几右。佐以鹽豉。讀書每數百行。仰一榻。自朝及夕。顛頰薰潤。薄暮。陶然步阡陌。吟嘯爲常。

高雲客少遭喪亂。自江左還舊鄉。補衣蔬食。塊處蓬室中。采搜隱逸。輯爲高士續傳。鑒別精嚴。論者謂其才識不讓士安。

高士續傳。起晉至明。凡得一百四十三人。

興化宗子發。陸懸圃。以高節能文章。名於江北。四方士稱曰宗陸。

宗名元豫。持高節。獨行古道。虛懷善下人。

陸名廷掄。魏冰叔稱其文。以直道自任。有毅然之色。與其爲人相似。

賈靜子負奇好大言。嗜酒不拘繩墨。常自許得爲宰相。當一年平寇。三年可盡撤諸塞上兵。里人大笑。以爲病狂。乃感憤著八陣圖數千言。

賈名開宗。河南商邱人。自稱野鹿居士。少落拓不羈。慕司馬相如之爲人。學擊劍鼓琴。嗜遠遊。已讀書爲文詞。力學好問。數十年卒軌於正。天下以純儒目之。

王子一自謂讀書三十年。方悟慚愧二字。

董文友道黃雲孫文。如王謝家富貴子弟。便極奢華。無裘馬執袴氣。又如渴虹飲水。霜隼摩天。變幻天矯。令人踴驚。

董名以騫。江南武進人。少負才望。豪邁感慨。不可一世。然當其恤交遊。忽然諾

輒復纏綿婉篤。比於膠漆。博覽強識。著書滿家。執經問難。弟子恆數百人。黃名永一。字艾菴。江南太倉人。乙未進士。孝友深摯。交情剴切。和神善氣。日坐人於春風。生平無疾言遽色。毀譽不經其心。名滿天下。而守如處子。

毛季蓮舟抵小孤山。逆瀾蕩楫。柔不可上。索漁人舴艋。隨波心沈入已。乃登作賦一篇。還示吳慶百。吳讀竟嘆曰。新穎動人。但覺洪濤春激胸臆。

毛名遠公。浙江蕭山人。丁巳。孝廉。

吳名農祥。浙江錢塘人。負軼才。世推莫匹。

江子九郊居。嘗製百籤。寫古人於籤面。風日晴好。輒煮茶焚香。隨取籤中人。相與罄彼我而評論之。竟日而罷。名曰雲社。

江名思令。浙江仁和人。慷慨負志略。辛酉舉于鄉。官黔陽令。亂後絕意仕進。徙居北墅。荒野寥落。孤介自高。富貴人不敢輒有所遺。即遺之多不受。

陸儂。胡自許儂語。爲海內少雙。

陸名繁。弼。一字拒石。浙江仁和人。大行鯤庭子。

安靜子讀書。如浪子入烟花場中。不知流蕩何所。

安名致遠。山東壽光人。

安靜子稱櫟園詩。情浮其貌。意勝於法。遠想長思。徑致獨絕。

吳介茲云。讀吳楚人詩。如入冰雪窖。使人冷畏。

野人名嘉紀。字賓賢。江南泰州人。

朱若始讀史。尤愛史記漢書。壯歲乃專攻漢書。曰。太史公如神龍變化不測。孟堅文整齊典贍。故可學而至。

朱名溶·江
南華亭人·

錢葆粉總角卽好倚聲。酒肆粉牆。倡家團扇。每因與會。輒有斜行。

錢名芳·江
南華亭人·
丙午孝廉·

徐子能和牡丹詩得百餘首。貫花結鬢。香粉散落。吳人傳寫爲之手。馥。

徐名增·江
南吳縣人·

包飲和讀書有常候。比讀必過丙夜。常授書友人宅。其宅高樓當城隅。販備儻焉。每丁夜渡江。其婦睡醒。聽包度紙聲。并竹中鷓。輒曰。鷓未呼。包二先生尙拽書起。徐徐後。販婦聞包死。出涕。

徐武合喜著書。苦無由得。錢易楮翰。常於破几上起草。束麻濡煤作字。

徐名汾·浙江仁和人·一稱管涔子·一稱京山人·一稱炎州學者·一稱笑癡·一稱嵇徐·少秉異
資·九歲通魯論易象·十三熟六經左國·十五誦文選秦漢百家書·善騷賦·十八當工詩古文辭·

方正

李映碧童時讀日記故事。見漢湖陽公主坐屏後像。輒舉筆抹其面。師怪問。對曰。事諧則移天。卽不諧亦
移心。吾實恥之。

李名清·一字心水·江南興化人·辛未進士·歷官廷尉·嘗列刑垣·數上章·論祥刑·獄
中人見疏·無不感涕·黏其疏語於獄街之壁·時共讀之·合掌誦佛以過·後以風節著稱·

蔣慎齋至性過人類多密行。雖齋居獨處。皎然不欺。

蔣名永修。一字日懷。江南宜興人。丁亥進士。官學使。

王邁人居官強項不屈。任意爲其難。八年不通京師一字。所遷皆極邊。卽單車就道。不惕利害。家計蕭條。幾不能朝夕。亦不問也。

王名庭。字言遠。浙江嘉興人。少貧。舉孝廉十四年。貧日甚。杜門局守。無雜營分好。日事詩古文。笑嘆歌詠。留連不去。中己丑進士。累官參政。

何蕤音官侍御。與張祖望友善。人短之曰。此君遺落世事。傲慢難近。何曰。今人不少便佞。吾正喜其傲慢。

何名元英。浙江秀水人。乙未進士。

張名綱。一名丹。字秦亭。浙江仁和人。美鬚髯。長尺餘。手足胸背。有毫寸許。夏月好袒腹臥大樹下。視富貴若不介意。性恬淡。不樂交遊。好詩賦古文辭。喜山水深溪邃谷。不避險阻。每得意。長嘯而返。

徐羽儀九歲善屬文。卽見知邑令。益自攻苦。同舍生或窺園。徐正色以諫。生悔之曰。童子何知。徐自恨誠不足格友。爲之不食。同舍乃慚謝。

徐名一鴻。江西懷玉人。生而早慧。容狀魁奇。經明行修。不在道以逢世。恆自嘆曰。吾讀書。獨不得明道爲憂耳。何慕富貴。富貴能福人。亦能禍人。嘗應舉。渡鄱陽湖。風變舟覆。遇救得免。同舟半皆溺死。徐覓其屍。衣冠殮埋之。又爲文以祭之。方去。

胡勵齋納言歸里。居恆端坐一室。左史右圖而外。若聲色貨利。徵逐遊觀之樂。去之若浼。菽粟布被。無異爲諸生時。

勵齋聰明強記。於書無所不讀。讀已。終身不忘。既杜門謝客。惟以古爲歡。自經史子集。以及老氏浮屠。天官形家。醫卜字義。音韻歌曲。無不手自裁定。勒爲成書。

陸麗京持己端潔。嘗教授臨平沈氏。有伎爲主人所索。就匿陸帳中。陸危坐讀書。就帳外書瓜田李下四字。去於披帷見之。頗相欽嘆。

豫章陳伯璣。避亂移家。與劉遠公流寓蕪江。杜門窮巷。雅志坐嘯。不輕以言于人。有引其家伯玉事爲詞者。陳曰。吾甯愛吾琴耳。因署愛琴於旅次。并名其詩。

陳名允衡。江西建昌人。幼負俊名。才雄等輩。父立字。直聲動天下。風采凝峻。有山斗之目。

柴虎臣生平拙於逢人。少營幹疎。懶率素於儕偶。閒好面折平議。顧胸無俯仰。人亦諒之。

柴名紹炳。一稱省軒。一稱翼望山人。浙江仁和人。生而奇敏。少喜文詞。馳騫聲聞。中年悔之。有意求道。以樸實恬澹爲歸。天質素羸。軀短小。膚色不華。而肝膈之要。無殊於大廷屋漏。與人言。未嘗不勉以爲善。動矚禮則。準於賢聖。居然有閩洛之風。

翁仲謙性孤介。不與俗諧。家酷貧。值歲儉。不能餬口。終日啜水而已。鄰近或有招之食者。謝不赴也。嘗曰。耐饑易。耐俗子難。惟徐介白。顧茂倫。餉之方受。後病卒。茂倫賣古琴殮之。

翁名遜。一字研石。江南吳江人。能詩善書畫。不入格而有高趣。介潔方正。雖貴遊至其門。弗見也。

徐名白。吳江人。朱長孺稱其嶽崎歷落。格韻在東野閻仙之間。

顧名有孝。吳江人。志氣邁往。身長七尺餘。妙擅經術。且能出入古今文章。其任事幾無所遺力。故人士皆歸之。

孫豹人應召入都。初以老病辭。不許。既將還籍。復有年老授銜之命。吏部集驗於庭。孫獨臥不往。旋受敦

促。乃徐入。逡巡。主爵者望見其鬚眉皆白。引之使前。曰。君老矣。孫直對曰。未也。我年四十時。卽若此。且我前以老求免試。公必以爲壯。今我不欲以老得官。公又以爲老。何也。衆皆目笑其愚。孫固自若。

孫名枝蔚。陝西三原人。身長八尺。聲如洪鐘。龐眉廣額。以詩文名天下。

今世說卷四

雅量

繆念齋初擢廷對第一。其意挹挹益下人。自奉益菲薄。欲然若有不足於懷者。計甫草見之。嘆曰。念齋之志行遠矣。

繆名彤。字歌起。江南吳縣人。丁未狀元及第。授官修撰。

汪蛟門居百尺梧桐閣。隱囊麈尾。頰酒彈碁。興致蕭遠。飄飄欲仙。

汪名懋麟。字季用。江南江都人。丁未進士。官中書舍人。事親孝。事兄恭。擇人而友之。敬而能和。其立心澹蕩而高明。

高念東家般陽。每風日晴和。自跨一驢。出遇嘉石濃陰。卽繫驢而臥。見者不知其爲貴人也。

高名珩。字葱珮。山東蒙陰人。性方嚴。骨清神佚。氣靜情疎。少年登第。筮仕館閣。歷任大僚。屢奉簡命。出入中外三十餘年。所在聲名赫奕。然不以富貴貧賤動其心。士大夫高之。

王匡廬不恆爲詩。每遇林泉清曠。襟抱悠然。輒復有作。諸子或請編錄。王諭之曰。吾寫懷送抱。如絃之有音。所懷旣往。則絃停音寂。何庸留此枝贅爲耶。

王名與。敕。山東新城人。

丁藥園初至靖安卜築東岡躬自飯牛與牧豎同臥起暇則乘牛車行遊紫塞中手周易一卷吟誦自若

丁名澎字飛濤浙江仁和人乙未進士官法曹無事日作詩與宋觀察荔裳施大參愚山嚴黃門顯亭輩稱燕臺七子名滿京師時上方册立念無媿典禮者調入東省兼主客貢使至譯問主客爲誰廉知丁持紫貂銀鼠美玉象犀從吏人易其詩歸國長安縉紳以爲榮

謫居五載略無遷謫狀躬耕自樂灑然有箕山之風

方穉官天懷坦易飲酒數斗不亂每良辰令節攜故人詣獅山劇飲歡呼曠然自放閒獨行道中諸田父相謂曰村釀新熟翁能從吾飲乎但苦無佐酒具方亟歸左提魚右持蓋行烈日中就其家酣醉達旦始罷

周樸園雪夜坐念室中獄事正急鐵衣周羅戶外方與黃山吳冠五共爲詩漏下數十刻不止嘗對臥薄板上已解衣臥忽聯句成兩人擁敗絮從口吻中溼不律露臂爭書薄板躍起短燭撲滅一笑而止

周又嘗坐獄堂下健卒稱擿立銀鑄藥壘呼疊聲如沸手拳據地顧伍伯乞紙筆作送客遊大梁詩三十三絕句投筆起對簿詩語皆驚人

吳名宗信江南休寧人

鼎革初兵戈四起人皆裹糧避山谷間徐竹逸與弟竹虛獨守敝廬晝則力田夜不廢讀儼如太平之世其避兵他處者率多受警歸竹逸語弟曰吉凶悔吝生乎動於今益信

董蒼水渡洞庭至鹿角山風大作波翻浪湧上流覆舟蔽湖而下僮僕震懼無人色董怛然危坐賦二詩投湖中竟得無恙數時輒行三百餘里見者疑有神助

讀名命。一稱樗亭。江南華亭人。遼初少宰孫也。童時喜讀古人詩。略上口。即能爲聲偶之言。父師見而叱之。乃吟詠自如。不少奪。庚子舉孝廉。與兄進士闕石。並以才名顯。後坐公事摧挫。不得用於世。卜築南村。方塘小樹。竹翠花深。灌園鋤菜。歌嘯自得。雖突煙常冷。意豁如也。

徐羽儀讀書靈鷲山夜陟北峯望月有虎怒嘯山谷震動或勸之避徐笑曰虎雖猛獸焉能齧人人惟畏虎虎故齧之意氣自若

明末兵亂有大猾招集散亡寇浙東西素與沈康臣有卻懸賞購沈急沈毅然儒衣冠往見曰某來矣殺一書生何購爲猾奇之大笑縱飲而釋

沈名胤范。一稱肯齋。浙江山陰人。丁未進士。官比部。好學。善讀書。尤以詩聞。

徐野君性坦易不與人忤每遇能文章者與言文章曉音律者與言音律善琴奕丹青諸藝者與言琴奕丹青諸藝常獨行村落山顛水涯值村翁溪叟樵牧童豎亦與談說周旋終日無倦色

吳錫孺閩失火時夜闌延燒將入宅吳起視從容還內取朝衣冠帶整束而出光燄燭天中鞠躬四頓首火隨熄

吳名晉刻。江南宜興人。壬辰進士。官司李。

朱子殷瓶無宿春歌呼笑傲不改其樂宋旣庭稱爲積學辯才今日之樓君卿也

朱名翰。浙江嘉善人。

王丹簾意思深遠。常有以自下。與人言。未嘗先一語。名士讌集。故未嘗不在。竟日冲然。若不知其在座者。吳六益負郭而居。堂曰梅花書屋。清谿喬木。映帶前後。每當橫潦載塗。塔下水深至骭。車馬到門。罕得見。吳讀書其中。意泊如也。

吳名懋謙。江南華亭人。

鄒程邨爲晉陵甲族。會有蜚語中之者。一日散萬金立盡。鄒四顧壁立。舉酒自慰曰。田園無存。幸吾賓客尙在耳。

諸駿男嘗同姜真源過金山。颶風大作。舟直觸郭璞墓石。時真源在別舟。意諸必大惶怖。諸方吟嘯自若。作過金山詩。

諸名九鼎。一名曇。字鐵閣。浙江錢塘人。才鉅而學瞻。貫穿經史百家之言。爲人英偉。個儻。有不可一世之概。

姜名圖南。字匯思。浙江仁和人。官御史。

吳郡葉林屋。以選詩遊四方。其弟尙從行。每同宿。共一布被。客雲居山。夏月無帳。窗外聚蚊薨薨。至旦。卒無一飛入室中。其友朱若始過宿。嘗之信。乃賦能弟詩贈焉。

葉名闡。江南蘇州人。寓居金陵。工詩文。好游。尙字豈僧。以畫名。

李鄭生游學白鹿洞數年不歸。獨居攻苦。夜半孤燈。忽見緋衣滿室。不之動。吟誦自如。

李名夢蘭。□□修湖人。家貧。喜讀書。弱冠舉孝廉。公車不第。筮蹇南歸。務益砥礪讀書。農時率一僕。躬耕自給。閒入城。禿衫椎結。行於市。人不知其爲名孝廉也。善奕能詩。工書法。人多求之。日不暇給。所見緋衣。或疑灑降鑿云。

黃大宗游楚。嘗月夜破浪江行。爲戍卒所追。扣舷吟嘯。神思自若。

黃名之翰。江南山陽人。是兵部蘭巖子。多才好游。跌宕自喜。性尙然諾。篤氣誼。與賢士交。解衣推食無倦容。

識鑒

丁藥園知中州貢舉。闈中搜采瑋異。得一卷。奇之。同考以波瀾簡質。度其人已老。請置於乙。丁曰。才與膽。時豈老生所辦。必年少知名。終爲大器。榜發。乃廬陽李湘北天馥也。同考出語人曰。吾以世目衡文。幾失此佳士。李果方弱冠。名振西清。以文章道誼服天下。

李號容齋。河南永城人。戊戌進士。歷官侍郎。著述自彙。讀書不輟。好賢下士。海內仰爲人宗。

王匡廬家居教諸子弟。絕不以時義程督之。詩歌古文。各徇其意。親串中或諷曰。諸郎君幸蚤露頭角。何不令銳力場屋。顧爲爾耶。王怡然曰。君勿言。彼伏獵侍郎。詎是甯馨物。

周樸園被讒。詣詔獄。幾死。獄且成。時父赤之家金陵。客爲之憂。赤之曰。吾今固甚念之。然吾生平無一念足死吾子。吾子又類我。於理不死。行當雪耳。且義命有在。吾卽日夜憂之。豈能遂脫吾子。卒與客飲酒。自若。已而事果得雪。竟如其言。

赤之。名文煒。素行屹立。人稱爲如山先生。周曰。吾如山哉。吾乃坦然者耳。因以自號。少以文自豪。尤喜賓客。嘗數致千金。爲人緩急立盡。初官諸暨簿。尋忤令。左遷王府官屬。會母喪過哀。竟以病棄官。教子成名進士。於所居爲昔有園。與向時賓客。鵬詠其中。謂之秦淮釣侶。又豫置一棺。當風日晴好。被酒入臥。命諸孫羣繞呼之。或擲梨棗出。使競相奔拾。以爲笑樂。更自撰爲墓誌銘。

邵薪傳言向子平未是達人既知富不如貧貴不如賤便應知死賢於生

邵名燈。江南常熟人。壬辰進士。官刑部。

趙洞門爲御史大夫。車馬輻輳。望塵者接踵於道。及罷歸出國門。送者纔三數人。尋召還。前去者復來如初。時吳菌次獨落落然。不以欣戚改觀。趙每目送之。顧謂子友沂曰。他日吾百年後。終當賴此人力。未幾。友沂早世。趙亦以痛子。歿於客邸。兩孫孤立。菌次哀而振之。撫其幼者如子。字以愛女。一時咸嘆趙爲知人。

吳名綺。江南歙縣人。官湖州守。爲治簡靜。放衙散秩。蕭然洛誦。繩牀槩几。燈火青燐。吏人從屏戶窺之。不辨其爲二千石也。喜與賓客遊。四方名士。過從無虛日。卒以是罷官。友沂。名而忤。長於詩賦。官中書舍人。

吳漢槎少時簡傲不拘禮法。在塾中見人所脫巾冠。輒竊取溺之。其師計青鱗。大加捶楚。後見吳所作膽賦。乃嗟賞曰。此子異時必有盛名。然當不免於禍。至丁酉科場事起。衆謂計知言。

計名名。江南南吳江人。

林視公自爲生藏。每佳日命僕夫荷藍。攜一卷詩。日造飲其所。人過問之。林笑答曰。卜吾真宅。愛此寂居。

遊雲翩翩。古今無期。聞者謂有劉參軍陶彭澤之風。

林名岳隆。浙江鄞縣人。侍御祖述子。有文名。兄弟四人。兄名棟隆。官少宰。弟曰萬業。能詩。工樂府。

有客薦相者。陳生於毛稚黃。謂其術比許負。毛曰。貧賤吾所自有。富貴本非所望。天壽不貳。修身俟之。僕自相審矣。政無煩此公饒舌。

賞譽

宋荔裳標格意氣。風流文采。並足推倒一世。尤悔菴目爲東海偉人。

尤名侗。字展成。江南長洲人。文辭超軼。經術醇深。弱冠名播天下。所交皆人倫英傑。初仕永平司李。後以博學宏詞科。特授翰林。朝野榮之。

汪鈍翁目王阮亭風姿玉舉。逸藻雲飛。

王阮亭和漱玉詞。有郎似桐花。妾似桐花。鳳語。長安以此。遂有王桐花之目。

王詞又有春水平。飄綠。夢裏江南綠。新婦磯頭烟水綠。程邛嘆曰。昔應子和名三紅秀才。今更不當稱三綠耶。

吳默巖謂讀王阮亭七題名。如乘騏驥。處處制以銜勒。而逸氣自在。

吳名國對。江南全椒人。戊戌進士。官翰林。

李坦園目毛會侯文。精鍊有法度。不爲枝葉之詞。

李名震。直隸高陽人。丙戌進士。官大學士。德器淵粹。退食後。手不釋卷。詩文爲海內所宗。

盧西甯少有異秉。斷乳後不食他物。晝夜飲酒三五升。一吸輒盡。家人謂之酒仙。

盧名琦。字景韓。浙江仁和人。生三歲。未嘗聞啼聲。迨五歲能語。遂與兄同就外傳。讀書往往不肯讓其兄。東方朔。每何兄未起。輒先至塾中。復所肄書。年十二。應省試。人多有物色之者。中丁未進士。歷官侍講學士。

孫忞庭稱唐濟武詩。刻鍊之工。山翠水笑。

孫名光祀。山東濟南人。乙未進士。歷官侍郎。

唐名夢賚。山東淄川人。生時父夢神人授爲傳說。故命是名。少負異姿。比長。卓有匡濟之略。己丑成進士。官翰林。言論丰采。雄眎一世。舉朝咸以公輔目之。

張禹木守會稽。言論讜直。顧且菴目爲暑月懷冰。凜凜有霜氣。

張名三異。湖廣漢陽人。己丑進士。爲政多奇績。有古良吏之風。

周櫟園稱金冶王抗厲希古不可一世。

金名鼎。江南鎮江人。治制舉業。不屑屑進取。好爲古文辭。人有購之者。面授之如宿構。性不妄交。其在白門。惟周櫟園吳衆香盛此公相往來。他客值之。瞪目直視。卒不交一語。強與語。輒遭詬厲。世以此怪之。

許有介稱周櫟園秋月澹面春風扇人。

許名友。福建侯官人。

儲同人稱周立五。其德足以敦天下之鄙。其學足以正天下之誛。其文章足以起天下之衰。

儲名欣。江南宜興人。

周名啓雋。江南宜興人。弱冠時。額未高。兩頤逼而禿。面有橘色。鄉人竊笑者曰。此黃冠相耳。周聞之。若弗聞也。年三十二。猶困童子試。借其父荊南。旅宿南城。外倉橋側。夢中見一雉冠綠衣人。右手操刀。左手提一人頭。鬚髯

如戟。至榻前易頭去。以手所提頭。兩其頭。周大驚。持父足疾呼。及舉手摩之。頭如故。凜凜者累日。未幾。頤漸高。兩頤骨漸豐。鬚鬢鬢然日益長。越年餘。又夢一白鬚老者。冠緇冠。執長尾壘。隨一金甲人。語曰。吾來易而腹。語訖。金甲人抽所佩刀。啓周腹。出滌其臟腑。而復納之。既納。以方竹笠覆腹上。復取釘椎釘四角。周夢中聞響。聲丁丁。而怪其無痛也。釘畢。白鬚老者。揮壘拂而祝曰。清虛似鏡。原本無塵。忽釘與笠。豁然有聲。周寤。自是文學日進。歷試兩闈。皆獲售。歷官侍講學士。

朱長孺見徐電發歎其天才駿發語顧茂倫曰此今之郭功甫也世有王荆公定當激賞其才邀致爲上客耳

朱名鶴齡。江南吳江人。貫穿六籍。折衷百氏。著書滿家。羣推學海。徐名鉞。江南吳江人。英姿玉立。個儻有大志。好古博學通經濟。弱冠才名蔚起。搖筆數千言。倚待立就。應薦博學宏詞。考授翰林。

毛可大稱顧茂倫人倫之雅鑒品目之善裁

毛稚黃道吾家大可生負異才挺然埃壙之表其類視鄉之人猶鷗鵠之繫而就鷄羣也

朱近修稱丁藥園風義高舉雄眎藝林天爲加絢地爲加藻

張祖望目陳其年其行敦篤而立誠其材灑瀚而精英其氣盤礴而淑靈

陳名維崧。江南宜興人。美髯髯。氣冲而盛。神睟以和。才情志意。如江河之浩浩。莫可砥竭。己未。召試。官翰林。

王丹麓稱張祖望賦盧枅以上張衡以下潘岳郭璞之儔

吳錦雯稱蕭尺木亮節高致博雅之宗

蕭名雲從。江
南蕪湖人。

吳錦雯目朱人遠。渥注龍種。丹穴鳳雛。

朱名爾邁。浙
江海寧人。

梁仲木至武林。一見孫宇台。便披衿契。謂人曰。若孫子者。所謂雲中白鶴。邴根矩劉士光之儔也。

梁名以相。直隸宛平人。任俠仗義。博覽洽聞。
與弟以樛。並有高名。江淮人士皆宗之。

有人問孫宇台曰。朱朗詣仗氣絕俗。揮斥一切。何以不罹禍患。曰。朗詣不矯矯立崖異。故能居磨涅之中。而無淄磷之損。蟬蛻塵垢。非凡識所及。

朱名士稚。浙江山陰人。金庭相國之孫。爲人
慷慨。不負然諾。貫穿掌故。有良史之才。

西陵諸名士風雅。都長虎臣稚黃。去矜尤精韻學。虎臣作古韻通。去矜作東江詞韻。稚黃作南曲正韻。麗
京嘆曰。恨孫慤周德清。曾無先覺。

陸麗京度曲四劇。薄遊武塘。錢仲芳大集賓客。卽令吳伶演唱。新聲豔發。絲竹轉清。四座之間。魂搖意深。
宗定九稱張子羽。丰度標舉。屐齒皆韻。

張名翀。一字圖南。江南江都人。流寓白門。以畫名于時。
性澹簡。有塵外趣。客過訪。茶瓜閒進。輒留連竟日。

龔半千稱屈翁山。龍章鳳姿。輝映南海。

輿名賢。一稱柴丈。
• 江南江寧人。
• 屈名大均。廣
東南海人。

諸駿男幼有文藻。警敏不凡。其舅祖嘗賞之曰。子居馬市。故自龍駒。

諸駿男道我家阿虎。洵是虎癡。

諸駿男云。王丹麓精鑒朗識。如冰壺映物。無不澄澈。

王丹麓爲陸蓋思妹婿。兩人刻意耽述作。時人爲之語曰。王丹麓寤寐千秋。陸蓋思神明萬古。

徐武令云。讀丹麓片言隻字。如噉梅腊。可以香口。

李杲堂嘗言。說經無雙。名擅八龍。昔有慈明。今見充宗。

李名鄴嗣。浙江鄞縣人。風骨不凡。年十二三能詩。即有秀句。父桐
• 官饒部。及殉難。喪從省至。放聲一哭。遂絕意人世。穿窬草石。
充宗。姓萬。名斯
大。浙江鄞縣人。

世目許九曰。天才雋拔。風格雄峭。

許名旭。江
南太倉人。

孫介夫稱嚴修人。其澹如菊。其溫如玉。其靜如止水。其虛下如谷。

孫名金礪。浙
江慈谿人。

嚴名允。字謙。浙江歸安人。七歲受經。十歲能文。十一游庠序。十五六百家諸子。淹貫略盡。二十三舉孝廉。二十四成進士。既生長華胄。又早得名。好學不倦。著述益工。官邑令。

吳門之有永叔兄弟。猶建安之有二丁。平原之有二陸。時人號稱雙珠。

永叔。姓簡。名泳。一稱懶仙。江南蘇州人。

落落穆穆。端介自守。羣推篤行之士。

宋去損云。方叔歸述雪舫盛事。如自旃檀林來。舉體皆香。

方叔。周姓。嬰名。福建莆田人。

許彝。千少便歧嶷。總角風氣更進。嘗詣從祖原孝。原孝索冠見之。左右曰。孫見祖。何復著此。原孝曰。此子是許氏南來之秀。

張帖思美。才稱尙。馬圖求比之。參軍謝寶。逸少王珍。

張名新杼。馬名駿。並江南山陽人。同舉己酉孝廉。

鍾百里。稱陳蝶菴。才酒俱壯。殊足念。

鍾名震。陽江南宣城人。

陳名周政。字子鵬。

四川營山人。

陳吳興嘗言。浙東之有吳賜如。猶西華有青柯坪。黃河有碣石。蜀江有瀘瀆堆也。蓋有削夷爲阻之功。真文苑之禦侮。

吳名之器
烏人
• 壬午
• 孝廉
• 浙江
• 義

今世說 卷四

今世說卷五

品藻

宋旣庭與宗弟疇三俱以孝廉知名。時稱大宋小宋。或問汪鈍翁。大宋何如人。汪言。阮思曠都。不及真長逸少。而能撮有諸人之勝。

疇三。名德宏。江南長洲人。辛卯孝廉。

或問計甫草。侯二宋三。可方古何人。計戲爲題目曰。研德如張子布。疇三如魯子敬。

侯名元泓。江南嘉定人。

陳其年與汪鈍翁論六朝之文。詞雄旨洽。鉤入深微。多出諸賢尋賞之外。時冒樸菴在坐。傾聽不置。陳遽掀髯謂汪曰。與子納交十年。今夕始稱知己。

冒名襄。一稱辟疆。江南如皋人。孝友易直。能文章。善結納。知名天下。

胡旅堂與龔總憲書云。研德疇三。吳門之兩玉樹。門下見之。定把臂入林。半千自是我輩人。氣不諧俗。非時賢所識。過蕪城時。試留盤礴。知其蕭遠耳。

胡名介。字彥遠。浙江杭州人。少有高志。立名節。寡雜交。遨遊公卿間。名譽甚盛。

毛大可目史訥齋。雖陸居家。事父怡愉。不閒嘻噱。有似陳季方。把臂堪托。以妻孥似朱生。見利思義。不因
人炎熱。似梁伯鸞。嗜酒疎脫。每一飲。必陶然盡醉。而諸務不失簡。則有似張黃門。訓諸經百氏。鈎深致遠。
可使擔囊負笈。執經問字者。不絕門舍。雖傾筐倒篋。隨叩隨應。猶然鼠壤有餘物。似馬季長。

史名延柏。浙江蕭山人。弱年蜚聲文林。豪蕩驅遣。領袖東南。凡人士讎會。有所譜記。不得史。名不就。

王西樵嘗稱林鐵崖異人者。三鬚眉奇古。略如李伯時所畫羅漢相。則異在容貌。下筆落落。能為崢嶸。詭
詭之詞。出入於孫樵劉蛻之間。則異在文筆。每當讎會。竹肉閒作。或值徜徉山水之際。時而意得忘言。如
釋迦拈花。達摩面壁。時快論斗發。又如春雷奮蟄。奇鬼搏人。則異在性情言語。

曹子顧子閒兄弟。人目爲雲初王謝風貌。阮何。

子閒。名爾坊。意思蕭散。不與外物相關。尤悔菴嘗以外朗內潤目之。三十六歲早卒。其子彝士。英姿好學。詞翰並優。中己未進士。官翰林。

曹顧菴目王丹麓。遂生集。爲鷺苑杠梁。文津。爲藝林。餽脯。

萬履安有子八人。長孫貞一。並稱令器。李杲堂嘗論之曰。粹然有得。造次儒者。吾不如公。擇事古而信。篤
志不分。吾不如充宗。足以文章名世。居然大家。吾不如貞一。至若學通古今。無所不辨。則吾不如季埜。

姚江黃太沖。每言浙東門風之盛。莫過萬氏。履安。名泰。一稱悔菴。生有異稟。美風儀。進止不失尺寸。舉丙子孝廉。亂後遂隱居不仕。文行爲天下模楷。李杲堂論其風格。比之東漢郭有道。黃徵君云。

公擇。名斯選。顏色充像。內腴外

豐。被服雍容。出言款款有序。

梅菴書法最斐。諸子中惟允誠得其傳。允誠。名斯備。欲言理學。則就

公擇。欲論經學。則就允宗。欲從衡今古。則就季瑩。季瑩。名斯同。

貞一。名言。生而不凡。乃祖嘗言。是兒魁梧。當不負吾門。比長。性嗜學。好

爲古文家言。每下筆。獨出冠時。黃太沖數稱其文。爲有戴剡源。歸震川風味。

明州有鑒湖社。做場屋之例。糊名易書。以臬堂爲主考。甲乙樓上。少長畢集。樓下候之。一聯被賞。門士臚傳。其人拊掌大喜。如加十賚。

世稱莊澹菴所至。如墨濡素練。便出雲煙。

莊名回生。江南武進人。丁亥。兄弟同舉禮闈。時年最少。入直史館。稱雙壁人。澹菴能自傾下。所至無間識與不識。折節論交。詩文書畫。脫手淋漓。士林爭寶惜之。

黃俞部目周櫟園吏事精能。撫戢殘暴。則如張乖崖。其屢更槃錯。乃別利器。則如虞升卿。其文章名世。領袖後進。則如歐陽永叔。其博學多聞。窮搜遠覽。則如張茂先。其風流宏長。座客恆滿。則如孔北海。其心好異書。性樂酒德。則如陶淵明。其敦篤友朋。信心不欺。則如朱文季。其孺慕終身。友愛無閒。則如荀景倩。李孟元。至其登朝未久。試用不盡。則如范希文。而遭讒被謗。坎壈挫折。又如蘇長公。

黃名虞稷。福建晉江人。

王丹麓蚤年高隱。甚負才望。趙千門亟稱之。比爲天地私蓄。

趙名鏞。山東萊陽人。戊戌進士。官司李。

黎媿曾文章雄視海內。徐巨源嘗曰：漢陽李文孫長汀黎媿曾。

黎名士宏。福建長汀人。

徐名世溥。江西新建人。

李名昌祚。字來園。湖廣漢陽人。壬辰進士。官廷尉。

董文友嘗言：予與評士，非惟文章道同，覺性情俱與我近。

陸麗京曰：徐世臣勵志箕山，斐然述作，方之西園，偉長非特不愧。

陸麗京年德轉升，往往領袖羣彥，然虛懷沖挹，不自滿假，或問卿自比稚黃，志伊如何？陸曰：志伊學海，稚黃雅宗，故當不及。

陸麗京與陳際叔孫宇台齊名友善，一日聯袂出北郊，道傍觀者竊嘆曰：此三人定爾殊常，何乃神理都肖。

陸麗京云：西陵儷語，家有靈蛇，若儼胡秀如春采，仲昭絢若朝霞，故當並推。

仲昭姓王，名嗣槐，浙江錢塘人，慷慨善談論，於書無所不窺。文詞瑰麗，尤工爲賦，己未召試，特授內閣中書。

毛稚黃嘗言：西陵有三絕，林玉達文搏掄神光，雲行雨步，陸儼胡駢體，行控送於絕麗，能使妙義迴環而來，張祖望詩：蒼溟頓挫，如大漠風莽莽無極。

陸拒石年十五作春郊賦詞藻流美筆不停綴麗京云王筠芍藥遜其敏正平鸚鵡讓其工
揮正叔過毛稚黃飲謂毛曰曩未識駿男然得阿虎令人有雄舉之思虎固當勝耶毛曰駿神鋒豪上虎
亦儁快正如蒲梢馱駝並驅康莊未知誰先後耳

毛稚黃過夾城陸氏出語人曰吾始交蓋思倜儻英澈器爲國寶發其堂仲季出揖高仲骨削神藹粹然
升璜鸞聳驥逸卓卓欲度諸兄已茂林公扶杖出肅然穆然使人瞻之不見所屈

茂林名之遇字際明浙江錢塘人抱材不偶學使者辟爲越州教授非其志也山巖水涯晚而自放所與
遊者惟處士徐野君雪厂道人余體崖道士餘人罕觀其面煙波上下羣展蕭閒望見者以爲古狂狷者流

高仲名信

善書

升璜名儁能
詩工篆刻

羅隨園嘗言老而好學有德有言吾敬張君祖望博聞強記不妄許可吾敬毛君稚黃雕龍繡虎與物無
競吾敬丁君素涵閉戶著書朗有卓識吾敬李君東琪汪洋千頃能以度勝吾敬沈君開先情辭斐亶波
瀾老成吾敬孫君宇台

羅名賢字倍千陝西華州人七世官郎署代有聞人爲關中貴族之冠七歲侍客飲客屬對曰山頭玉井蓮卽
應聲曰天上金盤露客異之比長益好吟咏嘗至京師名重公卿參軍臬幕無事日與西陵耆舊放情詩酒
久不得調益歌嘯自如有子
名姓年十四嗜文章有父風
丁名滌沈名峻會
浙江仁和人

李名式玉。
錢塘人。

規箴

王阮亭性和易寬簡。好獎引氣類。然人以詩文投謁者。必與盡言其失得。不稍寬假。

汪舟次兄弟。好古力學。名沸大江南北。戶外屢常滿。父意歉之。誠曰。吾不願爾曹為名士。名如翦綵鏤棘。實不存也。爾曹與人交。以其文。無甯以其行。郭泰之異茅容。庾袞之敬褚德。豈為名高哉。爾曹慎之。

汪父名汝蕃。字生伯。自言生平無異人。惟不欺二字。反復無愧耳。嘗築友善菴。出米數百石賑饑。身與妻子。粗糲自如。亂後家中落。乃整飭餘緒。每得金。即贖屯營婦女歸其家。又埋骨掩骼。二十年内。櫛櫨千餘。

蕪州顧赤方。出其詩與施愚山相讎。校嘗握手笑曰。吾儕本相好。攻瑕索垢。當猛鷲如寇讎。毋留纖塵。為

後人口實。時嘆為名言。

顧名景星。湖廣蕪州人。

文與也作畫。頗得待詔家法。然多率爾之筆。汪鈍翁規之曰。此事定須霞思雲想。刻意經營。奈何頽唐落墨。便布人間。

文名點。江南吳縣人。

鄒子先。趙砥之。並居吳江之西郊。亂後。邑人多謝去。子衿。俄學使者來。傳相告言。不出且遣戍。趙頗心動。鄒正色曰。我輩但當論是非。不當計利害。於是遂止。趙每為人言。微鄒君幾喪吾守。

鄒名甲芳·趙名瀚·並江南吳江人·時論鄒之剛決不撓·趙之服義推美·君子兩賢之·

捷悟

喬文衣夜半過午門前·萬籟俱寂·猛思日中百億生靈·今歸何處·人世升沈·如此而已·

喬名鉢·直隸內邱人·官司城·

安西估魏丙買卉布上海市·中夜就旅宿醉臥·風雨大作·失囊金三百兩·時上海令爲任待菴·素善讖·至是獄不能定·因詣城隍廟禱於神·請以實告·乃留捕隨往者·使待命於神寢宮·捕夢寢宮有幼婦出·右手抱細女·左手挈衣與之·及接視·則裙襴也·歸以告令·令俯首再三·仰而曰·夫賜衣而得裙襴·則非衣也·非衣者·裴也·豈有裴姓其人者耶·捕叩頭曰·似也·問左有裴愛·無賴不事家人產·其人僦旅舍傍·而得出入於其舍·卽欲得裴姓·此當是·令曰·然則其抱細女者·抑可知矣·夫細女·愛女耳·吾聞納音之數·陽·姓從左·今左非衣而右愛女·其爲裴愛·無可疑者·遂收裴拷之得實·

任名辰且·字千之·浙江蕭山人·丁未進士·

計甫草雪後攀鐵索造日觀峯·不見日出·於峯之傍見豐碑屹立·大書禮爲人子·不登高·不臨深·數言·計再拜稽首其下·卽杖策下山·不復登·

陸麗京誦讀明敏·善思誤書·嘗閱韓非子·至一從而成危·曰·是一徙而成邑也·後令他人覆射·無一合者·

惟弟左城中之。

左城·名槎·神骨
軒朗·詞令宏通。

胡循蜚官湘東司李。時定南王駐師於衡。一日召胡至帳下。曰：軍中有馬數千，需櫪五百具，命若三日為期。過期斬。胡出已暮，至江壩，適有人跣足立星露中，顧謂非司李胡公耶？何為至此？胡告之。故曰：小人家於江，有漁艇百餘，破其一，可得櫪五六具，請後二日以報。五百具鱗次江上，胡進之王，王大悅。

胡名貞開·一稱瑟菴·浙江杭州人·生數歲·祖襟寰中丞·見其超邁不羣·授以書·數行並下·性喜任俠·旁通藝流
諸術·每雄談·四座為辟易·己卯舉于鄉·時流寇猖獗·詔下大司馬·鄉貢中式後·別試騎射·一日·有司集壇下較
射·多鞠躬謝不敏·胡獨出一躍上馬·彎勁弓·抽矢·三發皆中的·遂擢異等·及遭鼎革·自甘放廢·開府張公物色
之·辟至軍門·備參謀·尋授湘東司李·有惠政·未幾告歸·畜聲伎·與人言·雜談諧調笑·自稱耳空居士·工書愛
畫石·為文絕類蘇長公·才大
用小·有志不就·時論惜之。

夙慧

徐電發蚤歲詔令。天姿英敏。年十二和無題詩。有殘月無情入小樓之句。長老咸嗟異之。

魏昭士生甫二十餘月。母口授歸去來辭。及九歌一二章。久之輒能背誦。諸父嘗抱持誘以果餅。使歌之。

聲悠揚可聽。相詫為英物。

魏名世倣·江西寧都人·是和公子·性狷急·勇於事·
仲父冰叔·嘗稱其為文·鋒銳所至·往往有沒羽之力。

沈漢儀總角時嘗從父公趾遊苑中公趾曰名卉不乏何以淵明愛菊對曰淡而能久也父嘆曰此兒出

語可人

漢儀·名家恒·一字
巨山·浙江建德人·

沈孚先十歲著大臣論稍長尙風節嘗讀漢書黨錮傳至度遼將軍皇甫規自以西州豪傑不得與黨人上書自訟沈足筆填其下曰時蕭山沈功宗以童子同將軍上書其慷慨如此

沈名功宗·浙江蕭山人·工詩·善書法·遇緣素·必移易書滿·
好談·每夜分列廣氈·置蠟燭其中·箕坐與客談·達曙不寐·

許彛千是許勉無子勉無讀書竟夜不輟許每臥聽父讀書旦輒默誦父嘆曰兒臥時乃過我醒時卓有枚七歲出就塾師使讀論語有枚嘗置一本掩所讀書下時竊觀塾師發視則司馬公通鑒也師以此奇之

有枚工部·去病少子也·浙江仁和人·生有異稟·父比
諸枚少孺·因名曰人衆·負經世才·著有古文集行世·

虞景銘十歲卽善屬文嘗薄柳州乞巧更作辭巧文識者知其遠到

虞名黃昊·浙江石
門人·丙午孝廉·

吳威卿七歲嘗侍客坐客論詩無孤獨連文者吳應聲答曰孤雲獨去閒非佳耶一坐驚嘆

吳名鷹·
錦雲子·

章言在幼從塾師學師出有友訪之比歸羣兒告以故而忘其姓氏師怒呵羣兒章曰毋怒也我猶能約

略記之。因以筆狀其類。額鬚眉。栩栩然也。師見而笑曰。是得非某乎。已而叩之。果然。

章名谷。一稱古愚。居北郭聖堂橋。其地古名散花灘。因又稱散花主人。少時曠神如秋水。膚色如玉。人多比之爲衛洗馬。嘗抵豫章。買舟歸浙。有美姬附舟尾。見章貌而悅之。數以足挑章。章起默自念曰。我違父母膝下久。今此江有神。倘一涉汙邪。致干神譴。葬于魚腹。即何日得復見父母乎。不覺泣下。遂整衣冠。危坐達旦。善八分隸體。畫尤工絕。爲時所稱。

趙禹功九歲。父游學歸。大雪不能舉火。出古畫一幅。命禹功詣友所。易米不得。家人悵然。禹功閉戶乃吟

詩曰。吾家有古畫。其價重連城。不易街頭米。歸來雪滿鬢。父聞之笑曰。有子如此。飢亦何憾。

趙名甸。浙江山陰人。母性嚴。小不豫。懇請備至。嘗出妻數月。感悟始返。里中稱趙孝子。

宗定九子舉兒。年五歲。會同諸兒戲于庭。一兒指月中言曰。月中那得有桂樹。舉兒曰。汝謂月中桂樹爲

奇。彼天地閒之有樹。當亦奇耶。

舉兒。名學詩。貌甚清貴。善言辭。喜讀書。性和雅。能體父母意。父定九。謂其識見動作。俱不似幼子所爲。六歲即殤。父甚哀之。

王丹麓座客常滿。有客謂孔子無鬚。衆詰其說。客曰。本孔叢子。子思告齊君曰。先君生無鬚眉。天下王侯不以此損其敬。故知今像多鬚。誤也。時丹麓子鼎。六歲。在側應聲曰。然則孔子亦無眉耶。客語塞。

鼎。字用和。器度端重。聰慧性成。喜讀書。講習便能了了。行文亦時露新穎。八歲學吟詩。有無情風雨過。花落不成春之句。客有談及紅顏薄命者。則舉大學集註中。天天少好貌一語爲證。以爲天字讀作上聲。即殤義也。十二歲即殤。識者謂其識云。

王丹麓病起畏寒。每當雪夕。閉戶謹風。時幼子小能五歲。坐著鄰上。曰。大人寒。故畏風。抑知風亦畏寒。王

問故答曰。風不畏寒。何由喜撲人懷。

小能。是丹麓第五子。資性聰敏。容貌端妍。孝事父母。迥異凡兒。
四五歲時。蒼頭負經市上。見者莫不嘖嘖稱羨。甚欲連手繫之。

今世說卷六

豪爽

世祖章皇帝嘗獵過溱沔河。宋牧仲從行。時天大寒。河冰闊二丈餘。宋揚鞭大呼。一躍而渡。上壯之。

宋名拳。河南商邱人。年未二十。博學能文章。詩歌筆翰動天下。望而即之。溫其如玉。出判黃州。虛已向學。與四方賢士大夫相交結。日肆游江湖山谷之間。

王阮亭爲同考。至白門。夜鼓柁行大江中。漏下將盡。始抵燕子磯。王興發欲登。會天雨新霽。林木蕭颯。江濤噴涌。與山谷相應。答從者顧視色動。王徑呼束苴以往。題數詩於石壁。從容屣步而還。翼日詩傳白下。和者凡數十家。

施愚山倡學湖西。問道者車接轂。蕭孟昉爲之供屏履。飾廚傳。勝流歛集。賓至如歸。

吳六益訪汪鈍翁邸舍。每被酒。自誦其所作游五嶽詩。音響琅琅。若出金石。覺爾時意致逾上。不可復及。汪然明教其子成名。卽放浪湖山。青簾白舫。選伎徵歌。日與二三知己。傾尊賦詩。以爲笑樂。望見者謂前則子瞻。後惟廉夫。差堪彷彿其概。

汪名汝謙。江南歙縣人。居武林。虞山錢宗伯。嘗稱其最博而智淵。幾沈而才老。熱腸俠骨。囊橐一世之志。氣如湫流。澆泉。觸地涌出。子玉立。舉明經。繼昌。己丑進士。官觀察。

周樸園性嗜飲。喜客。客日滿坐。坐必設酒。談諧辨難。上下今古。旁及山川草木。方名小物。娓娓不倦。觴政。拇陣。屢出新意。務極客歡而去。

熊雪堂令汝陰。時廬州被圍。隣郡偵探至城下。熊從墀堦閒磨盾鼻作答。一手雙挾硃墨二筆。運腕如飛。一往勃勃。真覺骨嶷氣涌。

熊名文學。字公遠。江西南昌人。辛未進士。歷官侍郎。

吳慶百應薦入京。止竹林寺。毛季蓮嘗偕叔大可。過吳寓。輒據柳牀。自吟所爲宴集及登臨諸作。大聲撼四壁。吳顧大可。君家阿咸。正復不減。將不使卿單行。

義興大饑。當事集紳士議賑。紳士曰。賑饑是極難事。毋輕議也。徐竹逸曰。天下難事。我輩不爲。誰爲之者。條陳數則。活數萬人。

李如穀官武昌郡守。荆州曹叔方。以所編樂府投之。會李坐黃堂上。立取梁州序。親自度曲。以扇代拍。時隸役百十輩。皆屏息而聽。寂若無人。歌罷。卽出千金贈曹。

曹名國榮。湖廣江陵人。

申冕盟偕楊猶龍。殷伯巖。行藁薄中。林葉颯然。疑有虎。楊據片石。負杖叱咤。萬壑雷鳴。同行爲之神王。

楊名思聖。直隸鉅鹿人。丙戌進士。歷官待讀。天才雋妙。風神卓絕。工詩。擅書法。性慎許可。閒科量人物。時有賞顯。以壇壝自命者。輒不肯屈一指。聞者慙之。

殷名岳·直隸雞澤人·官睢寧令。

侯朝宗豪邁多大略。少本有濟世志。嘗與吳次尾。夏彝仲。醉登金山。指評當世人物。臨江悲歌。二子以侯比周瑜王猛。

侯名方域·河南商邱人·幼博學·隨父司徒官京師·習知中朝事·嘗嘆曰·天下且亂·所見卿大夫·殊無足以佐中興者·其殆不救乎·去遊金陵·爲一時所引重·論者謂其詩追少陵·古文出入韓歐·

吳蘭次蕭散自得。陶然於酒。所至偕故交文士名娼高衲。放浪于山顛水涯。每醉輒歌吟笑樂。談調終夜。酒痕淋漓。頭伏几案。與之遊者。至忘寢食。

宋俗。上元夜張燈飲酒。睢陽司氏巨族也。張銀瓢容酒數斗。約能勝飲者。持瓢去。羣少皆醉臥。窘甚。時漏下三鼓。會賈靜子服龙衣駕鹿車。自百里外至。忽叱咤登階。舉滿一飲。卽擲瓢付奴持之。不通姓名。坐賓駭散。

雲閒田髻淵。董蒼水。兩孝廉。素稱好客。四方士大夫接踵而至。一日集圃如草堂。赴者五十餘人。兩孝廉相繼迎入。未與談。卽呼常從。具衍篋出紙筆。分題鬪韻而賦之。有頃。賦已會食。命廚割脍。酒炙交至。酒中各唱所業。盡歡而罷。

計甫草自海陵歸渡江。舟大風雨雪。舟不得發。同行者皆垂首歎惋。計坐舵樓下。手王阮亭詩讀之。至論鄭少谷絕句。哭失聲。旣乃大喜。拭涕起坐雪中。觀江濤澎湃。吟嘯自樂。

李礪園性好游。每興發。雖愛子牽衣割裾不暇顧。他事益漫不營省。蹤跡幾遍天下。所至名勝。輒爲文以記之。

李名淦。字季子。江南興化人。博學好古。少負才名。丰標落落然。與之言。縱橫古今。懸河注瀉。秀傑之氣。見于顰眉。性僻山水。每遊必窮巖崖隈澳。凡豺虎所嗥。蛇豕所窟。漁樵不能至者。必身歷之而後快。

淮海杜湘草過武林。冒雪遊西湖。樂甚。次日適王丹麓使至。遂以相聞。據案作書。忽傳方伯監司。聯車到門。並謝不見。士論高之。

杜名首昌。江南山陽人。書法文詞。卓絕一時。

吳錦雯游寓蘭陵。酒徒劍客。及弄阮咸撥箏篴者。滿座上。曰。解縑袍貫酒。酒酣對客揮毫。煙雲滿紙。

錦雯。生具異表。身長七尺餘。目青睛。鬢鬢甚紫。怒則戟張。胸有毫數莖。長三寸。爲人少言不泄。及遇事不平。輒侃侃不畏強禦。至推座罵起。與人交。舒兩要負氣好俠。急友患難。蓋疆直敢任。其天性也。

孫介夫遇王惟夏于邗關。執手道故。王固善飲。與入酒舍。洗醺而酌。浮滿數十盞。初坐客閔甚。聞兩人聲奪耳。皆瞪眸迎視。氣爲不吐。

王名昊。江南太倉人。善詩歌古文詞。樂府。吳梅村嘆其才。爲天下無雙。

陳興霸喜談兵論劍。抵掌天下事。酒後耳熱。輒罵古僞豪傑。不中一文錢。

陳名孝威。江西臨川人。大士仲子。

毛稚黃言。丈夫既有此六尺身。何可不令千古。

丁野鶴官椒邱廣文。忽念京師舊遊策長耳。驢冒風雪日馳三四百里。至華嚴寺陸舫中。召諸貴遊山人琴師劍客。雜坐酣飲。笑謔怒罵。筆墨淋漓。興盡策驢而返。

丁名耀充。山東諸城人。襟期曠朗。讀書好奇節。高譚驚坐。目無古人。

吳舒鳧托懷豪逸情與興俱。

吳名儀一。浙江錢塘人。髫年入太學。名滿都下。二十爲人師。經史子集。一覽成誦。古文法歐陽永叔。王荆公。詩宗杜子美。性善飲。飲醉。直市井子。輒謾罵之。姜定菴京兆重其才。延之幕中。歷邊塞。詩文益工。

謝書也好施數千金。都緣手盡復假貸。以費京師謂之窮孟嘗。

謝名晟。浙江山陰人。嘗登大觀臺。觀錢塘江潮。忽思年五十無成。大慟。見者皆怪笑之。

楊序玉園居器具精良。非世所恆有。客至命酒。珍錯疊陳。少醉。卽欲賦詩。或召治童歌。自吹簫以和之。

楊名方榮。一字東起。江南武進人。父以進士起家。累官中丞。家多伎樂。率善歌舞。治園圃亭池之屬。爲里中冠。楊生既習知歌舞處。凡吹簫擊鼓。鳴箏度曲。俱幼眇自喜。又美姿容。時比之潘衛。以望見爲幸。每一出遊。至傾市觀。顧好爲文章。能學歌詩。獵傳記。雖善談笑。不爲媿戲。後赴省試罷歸。愈發憤力學。凡昔日所往還者。率謝絕不爲通。曰。使吾讀書三載。卽不如古人。何至若妄庸人。徒逐若輩以爲豪耶。未幾以病卒。年止二十有七。諸從遊者。無不流涕。

王水雲常與茅子鴻偕渡大江。風濤洶湧。王掀髯稱快曰。吾胸中鬱勃之氣。對此稍舒。茅亦爲之放膽。

王名舟瑤。字白虹。浙江餘杭人。性爽負氣。不習輒媚。貧時得錢不甚惜。多與賢豪結驩。壬午舉孝廉。既久。不得志。始摧抑爲令。除授興安。又爲信之府邑。城中才數百家。爲之期月。坐嘯無所事。乞免官。不許。嘗抱鄰。瞋目曰。作吏願如此乎。發爲詩。多幽憂峭激。類佻傑失志之人。楚黃曹石霞嘗言。每讀水雲集。風雨欲來。聲淚交下。

茅名兆儒。一字雪鴻。浙江錢塘人。孤介自持。情深一往。詩詞書畫。涉筆輒工。

容止

梁蒼巖襟期瀟灑。意度廓落。大類坡仙。

彭禹峯長身脩髯。聲若洪鐘。一飲能舉數升。一食能盡一甌。肩汪鈍翁目為撥亂之異才。

彭名而述。字子籟。河南鄆州人。奇偉卓犖。氣蓋一世。庚辰進士。歷官參政。

張菴菴姿容瓌偉。飲噉日可三升。興至蒲博爭道。獨酌引滿。呼小僮搥鼓奏伎。奮興激昂。大噱不止。

張名王治。字無近。江南太倉人。涉獵強記。雅擅絕才。中丁亥進士。官黃門。初。菴庵兄西銘。以經術負盛名。其負笈從遊。巷舍為滿。揮洗輟餐。倒屣莫及。菴菴傾身容接。人人各盡其意。時論西銘之有菴菴。猶士衡之有雲。孟陽之有協也。

黃大宗狀貌奇偉。王昊廬見之歎曰。風神超逸。卓有父風。

王名澤宏。字涓來。湖廣黃岡人。少負異姿。纔十餘歲。下筆嫵媚。千言。乙未成進士。官少詹。李文孫稱其溫然為君子。

周芮公冲懷貞淡。與之晤對。如揖廣成。如瞻水鏡。

周名廷鑑。字元立。福建晉江人。戊辰進士。僻耽吟咏。尤好與騷人衲客相醉唱。

丁文博眉目明秀。如碧梧翠竹。

丁名彥。浙江嘉善人。己丑進士。官水部。

吳六益目錢礎曰神姿崖異有壁立萬仞之概。

閔伯宗性簡默意致蕭遠殊不大快人意久與居處覺欣然如飲醇醪。

閔名派魯一稱曹夕河南祥符人官溧水令善詩雅曠絕倫爲後來之秀。

嵇叔子目王丹麓神致蕭散超然物外。

程穆倩眉宇深古視下而念沈處治不媒進處亂不程方。

程名遼江南歙縣人能詩善書畫尤工篆刻蕭森老蒼迥然有異。

李戒菴美風儀嘗於上元夜著絳衣與郡中名士集賀監祠乘月上湖橋長嘯十洲人遙望俱謂神仙。

李名文純字姬伯浙江鄞縣人父樞官西川提舉知合州戒菴少善讀書老而不衰詩古文詞各臻其妙吳人言古今成敗爛若披掌聽者忘倦至所讀書無不經手鈔平居靜守一几流汗黏席寒風裂窗筆墨未嘗少閒。

丁大聲軀材拔起意識豪略咳如挺鐘言同奔河。

丁名克振浙江蕭山人用經術藝文著於鄉邑其因人緩急又多概節有魯連之風。

柏崑山過涉園魏青城稱其高風秀骨英采惠姿照映泉石。

柏名立本江南華亭人年未及冠實理精妙已入宋元之室。

魏名學渠字子存浙江嘉善人戊子孝廉官少參。

章六象神朗貌癯衣布不肉食長夜擁絮被危坐不寐讀書至旦爲常高簡淡泊彷彿如枯巖禪客與人

言肺腑傾盡。不事表襮。塵俗人望之。頽然自遠。

韋名人鳳。浙江武康人。與兄劍威。並能文章。尙氣節。

吳錦雯。張祖望。並有修髯。夏日嘗促膝吟咏。意思蕭曠。毛稚黃戲以詩云。吳公美髯不易得。張也于思亦自奇。長日吟詩相對坐。南風吹動萬莖絲。相與大笑。

沈去矜形弱不勝衣。而骨性剛挺。平時與人語。氣纔屬。及發辯議。則電閃霆激。摧屈一坐。

徐武令爲人樸訥。辭艱於口。平居輒好書寫。不知碁局。每自比方葛洪。

介公風儀蕭散。寡言笑。體羸若不勝。而神鑒淵然。每與一時諸名士接。但以目會。四坐盡通。退相品題。不失分寸。

介公。名元燈。字明介。天童寺西堂。

企羨

徐立齋扈蹕南海。世祖親控玉虬。一日。顧問尤悔菴者三。每覽西堂雜組。稱爲才子。時有以讀離騷樂府獻者。上益讀而善之。令梨園子弟。播之管絃。爲宮中雅樂。比之清平調云。

徐名元文。字公肅。江南崑山人。己亥狀元及第。官總憲。

徐健菴負儻才。好交樂善。於士類尤極推獎。宇內之人羣歸之。如百川之赴巨海。

徐名乾學。字原一。庚戌探花及第。官贊善。與弟果亭立齋。並以文章顯名。當世。時號三徐。學博才雄。與之遊。恂恂謙謹。言論所及。爲藝林所宗。

新城王西樵阮亭。每過郵亭野店。輒題詩壁上。詩既驚人。使筆斗大龍拏虎攫。尤悔菴道經燕齊見之。解鞍造食。坐對移晷不能去。

彭羨門驚才絕艷。詞家推爲獨步。王阮亭稱其吹氣如蘭。每當十郎。輒自愧僮父。

彭名孫適。字駿孫。浙江海鹽人。己亥進士。御試博學宏詞第一。官翰林。

王阮亭宦廣陵。一夕雪甚漏且三十下。風籟窸窣。街鼓寂然。燈下簡篋中故書。得吳賓賢詩。且讀且歎。遂泚筆爲序。明日走急足馳二百里寄之。吳感其意。爲刺舟來郡城。相見歡甚。

汪鈍翁初未游西山。逢人輒相咨詢。或曰。西山雖復崇深。意謂不如東南諸郡。清潭鏡澄。層峯屏峙。一花一石。相對饒有勝情。

廣平申和孟。不欲輕通貴交。惟致書汪鈍翁。微訊王吏部近狀。汪報之曰。吏部蕭疎簡遠。不失故武。誠吾黨第一流也。

申臬盟道。未晤櫟園。未睹滄海。自是生平兩闕。

周櫟園以少司農出爲督糧使。使江淮閒。四方之士慕之者。爭願見司農。舟車輻輳。道路爲隘。周櫟園貽胡元潤詩卷。輔以朋尊。胡展帙長哦。啓翼浮白。不知秋風吹墮白白。

胡名玉昆·江
南江寧人·

李方山客南昌。有傳宋荔裳已死者。特爲詩弔之。與宋初未識也。後至武林。聞宋尙無恙。李喜甚。借友人馬。疾馳相視。且出詩讀之。兩人因與泣下霑襟。已命酒狂飲極歡。策馬而去。

李名日景·山
東淄川人·

王丹麓居窮巷。門除肅然。顧且菴過。每促席移晷。嘗語人曰。見丹麓如把秋英。清芬襲人。如循古礪。仰峭壁。驟難梯接。

計甫草過順德。日晡方就旅宿。忽念歸震川。昔佐此郡。有廳記二篇。遂徒步入城。求遺址不可得。乃入署。傍廢圃中。西向設瓣香。流涕再拜而去。

盛此公嘗願此生得一少年。如張緒衛玠。王子晉能飲一斗不醉。得一老緇老黃。能痛飲酒。記天寶遺事。得一遲暮佳人。能歌離騷。舞三尺劍。醉讀南華秋水篇。

盛名於斯·一名籛·字
鏗侯·江西南陵人·

王山史與李天生初未相識。一日邂逅長安茶肆。隔席遙接。各以意擬名姓。及詢之。皆不謬。遂與定交。

王名宏撰·字無異·陝西華陰人·學
粹天人性命·克紹濂雝關閩之緒·

陸麗京酷推陳際叔文。典冊類相如。陸撰沈獻廷祝文。稚黃不覺。謂爲陳作。陸有欣色。

沈名士逸。浙江仁和人。

陸麗京。梯霞。兄弟聚處。嘗空瓦屋三間。張效青。步青。就居於陸。諸駿男過張曰。昔張陸同居。簷下。今復有醴泉交讓之嘆。

梯霞名增。高文異采。與兄麗京。

觀庭。魏爽。一時時號三陸。

效青。名璣。

浙江仁和人。

步青。名壇。效青弟也。庚子孝廉。

胡彥遠。高自棲托。神理雋邁。嘗隱河渚。近止城北。芳樹池塘。環接戶外。諸駿男每過談彌日。歸語人曰。嘗謂永興南穴。汲郡北山。緬邈不謂近在咫尺。

閩中邱則飛。以賣錠爲業。遊於山水之間。喜吟詠。集成求雲閒。張洸侯作序。過度州關。以詩謁權使者。見張序。云詩能張洸侯作序。豈尋常商賈耶。輒免其稅。

張名彥之。一名愁。爲王屋孫。江南華亭人。卓犖知大節。深沉好書。詩歌與董黃齊名。尤喜自負。使酒善侮人。然實無他腸。人以是原之。

傷逝

曹顧菴侍從說詩。數受世祖恩眷。攀髯餘痛。常結胸臆。每聽猿嘯。鷓啼。便欲愴然置涕。汪梅坡早年子女不育。哭之甚哀。每一念至。輒疑身是眼淚結成。

汪名鶴孫。字雯遠。浙江錢塘人。神情飛動。識解過人。錢虞山目爲開鍾之才。癸丑進士。官翰林。

林鐵崖持節駐珠厓。其地故多颶風。風起拔山飛樹林。嘗祖立中庭。仰天祝曰。好將某吹送到泉郡。開元寺內。挂東西千丈二石塔上。然後呼僧絙引而下。得見吾父母拊棺一慟。幸甚。

王異公賦十二哀詩。追數舊遊。目規口嘆。流灑揮灑。各竭思盡致。能令讀者摧惻。

王名撰。江南太倉人。古懷落落。生平不妄交。交必終身以之。

繆于野謂鍾廣漢若不歿。則神懷散朗。學義淹長。在後進中。吾未見其匹也。

繆名永謀。浙江嘉善人。

陳緯雲云。鄒董相繼零落。蘭陵舊遊。酒旗歌板。故地闌風長雨。不可復尋。言之悽然。不待過黃公酒壚。而始慟矣。

陳名維岳。其年弟也。江南宜興人。

陸麗京與沈駿明素無深好。聞沈負才蚤世。乘醉達其家。哭之失聲。從子儂胡。不輕與人定交者。亦一哀出涕。

沈名炳。浙江錢塘人。

趙山子既歿。有人議其短長。吳聞璋擲盃謾罵曰。斯人不死。鼠子敢爾。

趙名澤。江南吳江人。癸卯孝廉。

吳名鏞。一字玉川。吳江人。好遊。喜爲詩。遇名流勝集。言論嫻麗可聽。娶龐氏。字惠纒。亦工詞翰。流傳藝林。嫁時奩具頗厚。以吳不問生產。傾奩佐之。情安澹泊。晨昏或不給。倡和自如。

諸駿男過廣陵。嘆曰。小有之風流頓盡于一之宿草。久衰柴丈。遯跡於白門。梅岑栖蹤於遠郭。故人雲馳雨散。念此能不傷懷。

小有姓李。名盤。一名長科。江南興化人。

計甫草有才子準。早天。哭之哀。爲作思子亭。

準。字念祖。幼慧。能文章。獨好儒先之學。甫草爲聘。宋旣庭女。女名景昭。年十三。聞夫死守貞。居小樓十年不下。微聞親戚有欲奪其志者。輒不食。凡二十日。嘔血至盡死。

王丹麓有三子。幼子小能。最鍾愛。六歲蚤殤。王大哀慟。或爲太過。王曰。佳者不存。存者又不能佳。吾目未喪。方自愧不及情。君乃爲太過耶。言罷復益歎歎。

今世說卷七

棲逸

孫鍾元居蘇門夏峯村。清泉嘉樹。映帶茅衡。一觴一詠。翛然物外。李工部以爲先生本非隱者。其少時豪俠之氣。尙自稜稜爽露。

李名震生。號慎菴。江西安福人。乙未進士。

徐伯調處梅市。扁舟箬笠。弋釣自娛。落落與世俗鮮有所諧。會宋荔裳分守紹興宣城。施愚山寓書於宋。曰。山陰有徐緘者。渭之亞也。宋遣人招之。久不至。比宋罷官客湖上。徐乃時時來。相與盱衡抵掌。抗言。今昔意所不合。雖尊貴甚有氣勢。口期期不服。

宋射陵奉母不樂仕宦。退隱射陽之濱。自號耕海潛夫。名其圃曰蔬枰。

宋名曹。字邵臣。江南鹽城人。工爲詩。尤精書法。海昌。朱近修。稱其古道照人。足以師表海內。

宗定九性不喜煩。與人對終日。卽病。飲酌數夕亦然。或值勢利毀譽之場。便如溽暑置身赤日下。移家鄉僻。閑居未嘗至柴門外。或客至。或入郡。始一到門。不則數月兀坐草堂而已。

定九處東原草堂。秋日燕去巢空。巢泥時時落。汚几席。乃命童子探巢。汲水洗之。復徵洗燕泥詩。酷嗜梅花。堂有古梅一株。時人謂之宗郎梅。

王酉山解井陘之綬。高臥海曲清流映帶。喬木鬱盤。乃綸竿籥笠。釀黍種樹。閒與田夫野叟。較陰晴。課蟹稻以爲樂。

王名章。山東萊陽人。
丁亥進士。官邑令。

魏善伯曉聞鳥語。知是天晴。起來獨立。自謂至樂。

魏和公登華山絕頂。日月從兩耳升降。視黃河如襪帶委地下。燕趙秦豫。隱隱見黑子。俯仰天地。悲從中來。有入山披髮。長往不返之意。

和公素持高義。重然諾。好做儒畫策。林確齋以爲有太史慈之風。

龔柴丈隱居清涼山曲。有園半畝。種名花異卉。水週堂下。鳥弄林端。日長無事。讀書寫山水之餘。高枕而已。

郭去問。隱居綿亭山中。三十年織簾讀書。不求仕進。時比晉劉麟之。

郭名鼎京。福建福清人。書法最工。兼擅繪事。
宋去損嘗云。每展郭畫。便思放杖投足。

邱維正隱武原秦駐山。舍茅籬。榷身率妻子。力作以食。恆業樵。閒釣弋小販。暇說詩書。教二子孝弟。不見衣冠客。田夫牧豎。相爾汝。懽甚。素與朱近修善。朱乘閒訪之。邱方負薪。熟眎曰。何億也。出飯一盂。菜杯對

食喋喋竟日。不離樵事。朱曰：能出山信宿草堂中乎？不答。抱穉孫以嬉。久之曰：十年欲遊洞庭山，無一貫錢而止。朱遂去。

邱名上儀。江南武進人。少攻舉子業。好奇計。後去而應武試。遂成進士。累官參將。每之官。肩襪被一囊。去來不名。俸外一錢。蒞嘉湖。瀕海賊讎起。懼其威。浙以西咸帖服。守土吏毒民。邱較節風之。士民守參府門百人賀之。不內。樹豐碑。署天下第一清官。過其下。輒拜而去。

沈去矜家臨平東鄉。嘗謂張祖望曰：居山食貧，亦能不改其樂。恨無黔婁之婦、穎士之奴。羅瑕公云：樓居受用天氣，看春夏過接處，光景絕微。

羅名孚尹。江南上元衛人。

申自然居無定所。野店僧寮。匡牀布被之外，更無長物。閒走荒臺木末，哭其所知。謂人曰：終當以哀死。化為杜宇，擾人魂夢耳。

申名浦。江南華亭人。以畫名於時。黃太冲嘗言：自然好哭似鳥羽。無家似思肖。

賢媛

李孝貞事父終身不嫁。閭巷聞而化之。諸婦女有爭言詬誶相恐嚇，戒毋令孝貞知。時復爲之語曰：生女慎勿嗔，養父不嫁有孝貞。

孝貞。字鳳。秀州李夢康女也。夢康士而貧。夕不再炊。女織紵以佐養。父疾。禱於天。有鳥銜果臝。墮藥并中。嘗而進之。脫然愈。里中世族。爭欲聘孝貞。孝貞益不自安。一日。請於父曰：女孰賢。伴曰：善事舅姑耳。女曰：

休矣。焉有舍我父。事他人親以爲賢乎。竟不可奪。

汪魏美亂後隱居不出。其內嫻欲強之試禮部。出千金視汪妻曰。能勸夫子駕。則畀汝。對曰。夫子不可勸。吾亦不愛此金。其人慚而止。

汪名颯。浙江錢塘人。年二十二舉孝廉。甘貧不仕。嘗獨身提藥囊。往來山谷間。宿食無定處。與人落落。性不好聲華。時人號曰汪冷。當事或割俸金爲壽。不得却。坎而埋之。里貴人請墓銘。百金拒弗許。妻錢氏。字瑟瑟。南昌守武山女。初成婚。汪謂曰。吾本寒儒。得連嫻貴室。所望知禮義。孝事姑嫜。和妯娌。足矣。修簪珥綺繡之飾。毋庸也。錢即盡去服飾。屏侍婢。以疏布親操作。

杜于皇母性方嚴。生平不肯見畫師。一日于皇遇善手曾鯨。喜以白母。且云。鯨老矣。寫照其宜也。母作色曰。安有婦人呈頭露面。與男子注目熟視。而不知羞者。先王制禮。男女有別。何嘗云老者不在此例耶。

宗定九少時奉母陳家居。值歲凶。啼飢號寒。初不向宗族借貸。母曰。餓死事小。遣十歲童子。汗顏面以求人。使從此不知有廉恥。品行事大。於時以爲名言。

陳。江都人。州守九室第三女也。歸太學宗景巖。少闕家教。讀五經。周禮孝經女孝經諸書。兼通鑿二十一代史。有訓子詩六章。盛傳於世。

吳岩子吐辭溫文。出入經史。與人相對。如士大夫。

吳。青山人。爲卞楚玉配。以詩名。工書法。晚更好道。得奇疾。疾作則右手自運動。日夜作字不休。或濡筆書紙上。悉成元理。疾止。不復記憶。凡二年而愈。白髮朱顏。奕然有丹砂之色。長女元文。工詩辭。次女德基。善畫。並賢能好讀書。精筆札。先後事劉孝廉竣度。竣度以賢豪名廣陵。

丁季淵繼婦張夫人。親喪三年不脫衰。以親染風疾。終身不言風。嘗作討李賊檄。顧和知以爲孔璋讓其

英蕤賓王失其峻烈。

顧名若環。浙江錢塘人。上林署丞。顧友白女。學使黃寓庸長子。文學東生婦。生具夙慧。尤好讀史。上自班馬。以迄列朝典故。能陳說。或論著其大旨。又以其餘力。自肆於詩古文。每夜分。執卷諷詠良苦。曰。使吾得壹意讀書。即不能補班十志。或可詠雪謝庭。嘗於食頃。作七夕詩三十七首。一時嘆其敏妙。文章館行。爲武林閨秀之冠。

術解

胡勵齋博綜羣書。尤精天官家言。日月薄蝕。星辰躔度。推測毫髮無遺。在長安與監中西洋專家。反覆辨論。羣皆歎服。

胡著有中星譜。周天現界圖。步天歌行世。

龍舒方直之工射覆。客匿黃錢一命筮之。方曰金體四文。既圓且方。流布天下。錢文爲光。竟中錢。坐客莫不歡悅。

方名其義。江南桐城人。天才橫溢。不讓其兄。力矯健能騰身屋上。履如平地。時推爲兼才。兄密之。優於天官易數。亦精射覆。人以公明曼倩。不能遠絕。

吳志伊亦精樂律。曾於市上見編鐘一枚叩之曰。此大呂鐘也。後滌視款識云。古大呂之鐘。陸麗京。孫宇台並精京氏學。於甲申除夕。各占元旦明晦。麗京決晴。宇台斷雨。次早。曛曠日出。晚即滂沱。兩來人咸異之。

孫宇台既精易課。兼善潛虛。嘗與陸麗京同在臨平沈去矜座。陸舉之字問孫云。今日當得幾客。孫應聲

云之文十一也。已而果驗。

海昌范文園工相術。邑中有隙地。或塑太歲。范以爲威儀具足。應享巍峨。未幾遂成巨剝。又指禾中千佛閣。肖型慘戚。當厄於火。已而果災。

范名驟。文白弟也。浙江海寧人。事親孝。與兄弟友恭。於朋友信。而又好推分施與。拯濟人之艱危。嘗夢神人付以右書。自稱右書道人。遂精相術。語多奇中。入京師。一日驟名動公卿。

巧藝

毛大可善歌。沈康臣吹洞簫和之。能曲折倚其聲。

沈工書法。王柳頰歌。鉤畫摹脫。盡變極神。旁通篆籀。偶刻石爲印記。士林寶之。

萬年少自詩文畫之外。琴棋劍器。百工技藝。細而女紅刺繡。惰而革工縫紉。無不通曉。唐叔升嘆謂我輩十指雖具。乃如懸槌。若是何種慧性。一能至此。

萬名壽祺。江南淮安人。己卯孝廉。

唐名堂。江南金谿人。

顧樵水詩篇秀絕。畫亦屬能品。嘗作秋林圖。贈吳梅村。吳嘆曰。對此尺幅。使人幽思頓生。

顧名樵。江南吳江人。

吳名偉業。字駿公。江南太倉人。舉辛未會試第一。歷官司成。

洞庭葉林屋少嘗學翁家鎗每投石超距以驗其法會有賊艦泊太湖欲上山肆掠葉倡率鄉勇卻之一時稱其絕伎

王筠侶工繪事不屑屑師古所畫山水樓觀人物草木蟲魚蕭遠閒曠閒出古人之上人爭貴之性任誕不羈非其所悅雖權貴人迫之不輕作

王名崇節直隸宛平人。大索伯敬哉母弟。生五歲而孤。多病。習懶慢。不喜爲章句學。學擊劍走馬。舉武科。爲興州衛千總。久之不樂。棄去。放浪家居。益肆力爲畫。宗伯素友愛。筠侶未嘗倚門地。請謁。足不至公卿門。或乏食。不肯向其兄及從子輩索一錢。甘心貧約。以繪事自食其力。士大夫雅慕其人。求畫者滿戶外。必先償直後欣然命筆。梁大司農見之。稱爲絕藝。厚酬以綉帛。辭不受。曰。崇節貧安用帛爲。更易金如其常直。強之乃受。其廉於取又如。此。朝廷聞其名。召見中和殿。筠侶偉丰儀。鬚長數尺。上命起立。視良久。令供奉畫苑。時年六十餘。以足疾引退。從子司空。爲築室娛老。遂不出。未幾。病卒。畫益貴。生平不飲酒。喜婦人。得金即持往狹邪立盡。初私一婦。其夫覺。撻之創甚。婦自經。一夕坐室中。見婦忽至。似有所語。筠侶大驚憤。家人於簾間見婦裙影。隨之入。遂不見。亦異事也。

蔡子珮具絕人之姿不恃攻苦輒能爲文章詞賦歌詠論議卽下及書數繪畫博塞遊娛之細無不意志所至手目畢達

蔡名璿。浙江蕭山人。

毛稚黃小姬療勢漸欲肉骨沈去矜以一刀圭愈之毛大驚嘆曰曾聞敵二豎過於五丁東陽顧影腰帶幾何竟具神力乃爾

沈文人工繪事兼善音律閒爲小詞直窺稼軒之奧其穠情逸韻周勒山謂蕙草雪消不足方也

沈名永令。江南吳江人。官龍門令。

胡循蜚下第南還。至汝陽之西。遙望黃埃起處。一矢驟至。少頃。賊披介冑。奔耀日中。同行者盡蒲伏。胡躍怒馬。從衆中出。拓弓大呼。連擊數賊。賊披靡走。胡徐過市。下馬解衣踞胡牀。乘風綠槐樹下。久之。同行者始至。驚曰。神人也。

錢塘藍田叔工寫生。陳章侯請藍法傳染。已而輕藍。藍亦自以不逮陳。終其身不寫生。曰。此天授也。

陳名洪。綬。好畫蓮。自稱老蓮。浙江會稽人。數歲見李公麟畫孔門弟子。勒本。能指其誤處。十四歲懸其畫市中。立致金錢。後遊於酒人所。致金錢。隨手盡。尤喜爲寢衛畫。寢衛藉陳畫給空。豪家索之。千緡勿得也。嘗爲諸生。學使索之。亦勿得。顧生平好婦人。非婦人在坐不飲。夕寢非婦人不得寐。有攜婦人乞畫。輒應之。崇禎末。命供奉。不拜。嘗以兵罷。所寫博古牌。爲新安黃子立摩刻。陳死後。子立畫見陳至。因命妻子辦衣斂。曰。陳公畫地獄變相成。呼我摩刻。遂死。

張閒鶴性簡曠嗜飲。多少進輒醉。醉輒喜畫蘭。勃勃有生氣。陸子黃嘗得所畫。懸之素壁。忽發香滿室中。陸異之。因額其處曰蘭堂。

張名道岸。字懸渡。浙江湖州人。茗南四隱。張其一也。

祝培之年已七十。能於徑寸牙牌上。書桃源記。細髮爲行。微塵遮字。更留其下爲作圖。周櫟園見之。嘆曰。使劉子驥遇此。定應畏其局促。攢眉而去。豈復生問津想。

周又嘗稱濟南胡春。以鶉管作簫笛。有穿雲裂石聲。

寵禮

世祖御極之初。名公卿大臣子弟入衛。時商邱宋文康公長子牧仲。年甫十四。儀觀俊偉。冠侍從冠。蟒衣袴褶。帶刀侍上左右。上愛重之。每賜食中和殿。一日。牧仲對食。遜避。私出帶閒斜幅。裹餅餌棗栗。將懷之。上怪問。牧仲前跪謝曰。臣有祖母老。甚愛臣。臣懷以獻。榮上之賜也。上喜。自是每賜食。必盡敕以歸。琉球中山王請封。上慎於擇使。下部議。須通經術。善詔命者。廷臣會推翰林汪楫。以充正使。汪才質端偉。專對具宜。入見。上大悅。賜一品服。璽書金冊。臨軒遣之。汪自國門駕八騶。天仗前導。龍旆飛揚。都亭張設。不絕於路。朝士賦詩送者數百人。

康熙二十年。琉球國世子尙貞。遣陪臣來請。襲封。上嘉其恭謹守禮。許之。故有是名。

金沙史遠公精畫事。鎮國公延之閣中。屬以縑素。時方初暑。史濡毫脫冠於案。公來縱觀。戒令勿起。史遂忘冠。坐爲應對。蔣馭鹿從旁笑曰。山野之士。疎放自然。若史某者。真所謂脫帽露頂王公前矣。公笑應曰。君不見揮毫落紙如雲煙耶。

公精白純謹。樂善小心。願以漢東平自期。閉居雅好。詩文。兼事翰墨。禮賢下士。氣度淵宏。無有涯際。

史名鑾宗。江南金壇人。願而長。美髯髯。高顯濃眉。睛光射人。心靈敏多藝能。能詩善弈。工字學。兼精丹青。凡智巧事。人不能解者。一見輒悟。悉無疑。辛卯舉孝廉。慷慨有大志。浮沉學舍。爲生徒師。鬱鬱不得志而死。蔣名鑑。一字玉淵。江南武進人。鎮國公開府奉天。禮聘天下名士。馭鹿首應其選。毛稚黃云。馭鹿無干而好遊。忘名而喜友。

任誕

金穀似詩歌頗有唐調。汪鈍翁北遊時。金來話別。值賓客盈坐。金都不敘語。竟出其所作送別長歌。朗吟一徧。捧腹謂汪曰。此詩何如。高達夫舉坐默然。汪領之而已。

金名式祖。江南吳縣人。

劉公融性曠達。嘗置酒慈仁寺松下。遇遊人至。不論識與不識。必牽挽使飲。有不能勝者。必強灌之。至醉嘔乃已。

劉名禮仁。江南潁川衛人。乙未進士。官吏部。

姜學在嘗襪被挾一童子。附估人舟。往登洞庭東山。山中多富人。絕不與通刺。相羊僧寺中。見一丐者。題壁絕句。異而物色得之。延置上座。與之共飲食。丐者不知何許人。願握姜手曰。若真知我者。姜遂大喜。

姜名賞節。山東萊陽人。爲黃門貞毅先生仲子。少不事舉子業。獨習爲五七言詩。善鑿別書畫。及周秦以來器物。遇其所欲得。雖印價以售。不吝也。僑寓吳門。所居位置潔清。日邀致諸名士。賦詩飲酒。盡出其所蓄書畫器物。摩挲賞玩。移日。抵掌不倦。絕無貴公子驕俯態。雖吳中好事者。亦相顧以爲不如也。丐者與姜論詩。稍久。輒亂以他語。僧或侮易之。丐者起批僧頰。竟去不顧。他日姜又訪求丐者於途。人或誚姜。交非其類。姜益大喜。錄其數詩歸。攜以詫汪戶部鈍翁。汪讀其詩。多恍惚物外語。因謂微獨丐者異人。即公子亦異人也。

梁公狄初與豫章王于一交。兩人相論詩。每篇成。不卽示草。率相攜至荒臺古寺。車馬不經處。始出詩共讀。狂呼驚拜。或至慟哭而後退。

梁名以樟。一稱鶴林。直隸宛平人。庚辰進士。官太康令。每在酒坐。主客獻酬。獨據席。出袖中白板扇字。高聲三讀。不覺四坐有人。

陸麗京與徐孝先分雖甥舅契若金蘭嘗劇醉共被臥徐哈噓中大吐早起不覺但見牀下地污乃曰舅昨茗芋耶陸亦不能辨。

徐名介。浙江仁和人。

陸麗京云苟奉倩取婦遺才存色此是至言非關興到假令左思張載可與同筆研甯可共枕席耶。柏斯民性僻山水嘗寓西湖一日冒雨執繖獨上北高峯頂引領四望衫履淋漓見者咸笑爲癡柏意愈自得。

柏名古。一字雪耘。江南華亭人。蓬蒿滿徑。簞瓢屢空。工古文詩詞書法。曠然有千古之志。

沈漢儀家貧好客每遇良友輒慷慨沈飲或勸以稍事生業對曰良朋樽酒吾故藉以生者。丁野鶴在椒邱每晏起不冠溺管倚樹高哦得佳句呼酒禿髮酣叫傍若無人閒以示椒邱諸生多不解因抵地直上牀蒙被而睡。

王丹麓不好棋每見客手談輒亂其局或竟擲子納奩中曰日朗天清奈何爲此鬼陣。

王介人善故金吾張道藩一日張會貴客並邀王酒行舉樂客皆正襟坐王直入解髮跣兩足踞上席客大驚目眇王王言笑自若。

諸虎男常云。酒可千日不飲。不可一日不醉。

沈子均從朱近修游。妙峯菴。遙望棲鳳災。棲鳳故沈所居。人爲沈弔。沈曰。可賀也。詰其故。曰。家所有惟身耳。我已攜家妙峯來矣。庸何弔。竟不歸。

沈。浙江奉化人。少時饒生產。任俠贈人。遂中落。又喜飲酒。醉或眠井中不肯起。善談諧。娓娓竟日不倦。亦工唱曲。偶從蕁湖歸。唱於途。有人躡武至其家。怪問曰。客何來。應曰。欲走奉化。聽公曲。迷失路耳。沈以爲知音。止宿設醴。成賓主禮而去。

今世說卷八

簡傲

汪鈍翁性狷急。不能容物。意所不可。雖百賁育不能掩其口。其所稱於當世人物之衆。不能數人。汪鈍翁頗自患懶放。兼以此規王西樵。王莞爾曰。長安車馬喧闐。若無吾黨一二孤寂者。點綴其閒。便成缺陷。

周櫟園好客。然不耐俗士。有過從者。周便率意與談。盡輒望其去。坐少久。輒露不快色。去又輒忘其姓字。謝石臞判常州日。持一卷書坐廳事。有吏抱牘至。輒揮之。鄉先達請燕見者。亦往往謝去。顧喜與諸生論古今。以文章爭勝負。人目之爲傲吏。輒欣然有喜色。

謝名良琦。字仲韓。一稱獻菴。廣西全州人。壬午孝廉。

陳散木性狷介。不爲苟容。素健辨論。遇客或不合。抗首立拄之。不少遷。隨或憾焉。散木悶而曰。我之所嫉。怒我固然。卽爾見喜。正復何益。

陳名世祥。字善百。直隸通州人。才勇氣銳。落落寡合。與同好堅則金石。意所不屬。望望然去之。性嗜飲。善治觴政。生平博覽強記。每與座客會。隸事肆應不竭。弱冠舉於鄉。久乃得官新安令。終以不肯折腰解組。歸益獨行其意。

·托興於詩詞。雅好游名山水之所在。
·淹留至忘歲月。家人生產不問也。

王山長嘗讓杜于皇。傲慢不求友。杜云。某豈敢如此。只是一味好閒無用。但得一覺好睡。總有司馬遷韓昌黎在隔舍。亦不及相訪也。

王名岱。湖廣湘潭人。能詩文。兼工書畫。嶽崎磊落。以氣節自命。愛甫燥。名滿海內。己卯孝廉。官學博。

燕人梁公狄。瘠立嶽崎。遠客萬里。初至鄞。客於梵舍。兀然坐一藜榻。有客造戶謁。入不延。里中薦紳聞梁至。置酒相迎。梁彊一過。見席中客有非類。即命人取水洗兩目。良久立上車去。

徐大文將游豫章。其友吳慶百。林玉達。送之時。徐年少慷慨。涉江遙指。笑曰。吾過洪都。惜子安已沒。無可與言詩者。客或乞吾書。正恐麻姑碑板。羞見吾耳。

徐名林鴻。一字寶名。浙江海寧人。少時即名播江左。數好游。所至公卿大夫。及賢豪長者。爭願交歡。

來成夫授書江園。與其徒同邑沈功宗。山陰傅宗。夜秉燭。藉廣氈箕坐。縱談古今興喪得失。及漢魏以來。理學藝文人物。徹三晝夜。及遇軒冕與不當意。端視緘嘿。雖終日不出一語。問之。閒亦不對。故相值者。多卜來語嘿。以示臧否。至爲語云。言勿言。視來蕃。蓋重之焉。

來名蕃。浙江蕭山人。負夙願。十歲出試。輒冠軍。兼精六書。能作古文。魚鱗大小篆。爰隸八分。第不輕爲人寫。好立名節。每道東漢人物。人有以東漢人物相擬。則喜。來本甲族。蕃獨居質空。敝衣摻裂。所儲圖史外。惟餅益十餘。實米鹽紵絮於其中。每出行。書衣筆囊。手持抱。至有挂兩肘。囊。蔽以博袖。儼五石匱者。嘗大雪。忽憶毛甡遠遊。覆笠登香爐峰。四顧蒼茫。吟所製八君賦詩。慟哭乃歸。

商邱徐恭士榜其門曰。問君何所長。客至必指此問之。有一藝者。卽與盤桓竟日。或都無可採。輒踞坐揮手曰。客休矣。

徐名作肅。河
南商邱人。

董文友少時。氣勇神踔。視天下人無可交者。每朋聚翕。手揮而已。如不相識。及合坐。捉筆爲文。獨寫數千言不休。文成。坐客不解一語。輒瞠目相視。人咸目攝之。

沈君善。性不喜俗。嘗持不語戒。手懸一牌。上鐫不語戒三字。有貴人訪之。曲致殷勤。君善瞠目直視。出牌示之。不交一語。貴人去。適周安期。顧茂倫。及其弟留侯。來相與傾倒。雄辯四出。或譏其太過。君善指其口曰。天生我口。不解與僮語。見快人不與語。又安用我口耶。

沈名自繼。江南吳江人。副使琬之子。與弟自微。自炳。自嗣。

自然。自南。自東。妹宛君。俱有才名。詩文盛行於世。
周名永年。吳江人。少負才名。制義詩文。倚待立就。才器通敏。風流宏長。禪宮講席。
西閩北里。參承錯互。詩酒淋漓。莫不分身肆應。獻酬曲中。海內咸以通人目之。
留侯性簡亢。嘗謁大吏。雅聞沈名。以所作詩文示之。沈覽畢。盛稱其居官。大吏曰。以詩文示子。子稱某居官。何也。沈曰。知公勤於政事。那有閒心檢點及此。大吏甚銜之。

排調

客問汪鈍翁。何意沉醉故籍中。汪徐應曰。身之好書。政如君侯之好博奕。彭羨門在廣陵。見沈去矜。董文友詞。笑謂鄒程邨曰。泥犁中皆若人。故無俗物。

劉公勇棄官入蘇門。依孫鍾元。嘗築堂孫所居側。久之。厭其蕭寂。棄所攜一琴於堂而去。因名留琴堂。王儀曹作留琴堂詩。其起句云。身是巢由未得閒。聞者便爲絕倒。

葉元禮素病羸。然頗不耐杜門。客有憂之者。或笑曰。猿狙之性。動而彌壽。

有人語杜于皇。某一介不與。卻未一介不取。可謂一邊伊尹。杜應之曰。某無周公之才。使驕且吝。豈非半截周公。

宋禹域短而多髯。嘗同沈漢儀譙集。沈曰。吾爲監史。當以兩官畀一人。因指宋曰。汝以參軍兼主簿。衆客皆笑。

宋名嗣京。一稱定山。浙江仁和人。丁未進士。官邑令。

計甫草故貧士。嘗置一妾。晨夕設食。惟粗糲而已。妻張夫人諺曰。古聞糟糠之婦。不聞糟糠之妾。如何。舊有相國堂聯。放開肚皮吃飯。立定脚跟做人。或議首句不佳。徐野君曰。彼小人常戚戚者。震雷常在匕箸閒。那能放開肚皮吃飯。

陸麗京飲陳際叔家。半坐欲起。謂主人曰。陳家惟卜晝耳。際叔弟魯季對曰。君不聞孟公投轄耶。陸更入座。

毛大可會侯。同詣李湘北。李笑曰。不謂今日初見二毛。

徐世臣與陸麗京同舟下臨平。談笑百端。竟日相持。時潘新彈及陸弟左城俱從壁上觀。但覺入其元中。不能定其勝負。

潘名沐。浙江仁和人。
癸丑進士。官翰林。

王丹麓年踰四十益復困頓。婦戲語曰。同學少年皆不賤。奈何夫子獨長貧。王曰。吳廬少詹有言。貧者上天所設。以待學者之清俸。金陵吳介茲亦言。天以貧德人。今處儔類之中。天幸德我。特頒清俸。義難獨享。願以共卿。婦哂曰。君意良厚。但不知何日俸滿耳。

婦姓鄒。文學公選女。十六歸王。布裙操作。客至。供饌惟謹。一日王欲留客。適無錢。大爲踟躕。入謀諸婦。婦故難之。曰。身所有祇此髮耳。惟君所裁。王曰。卿未嘗倩筆畫眉。願乃假手。被髮耶。婦笑拔簪付之。

輕詆

周櫟園見士人日事奔競。輒曰。是以日遊神兼騎望火馬者。

宋嘉祐中。未有謁禁。士人多馳騖請托。有一人號爲望火馬。又一人號爲日遊神。

蔣絢臣與周櫟園論詩云。時選雖惡。然亦有足採者。臭泥中生蓮花。但採蓮花。勿取臭泥可也。周云。但恐盡是臭泥。無蓮花在。

蔣名玠。一字用巖。
福建閩縣人。

王阮亭自淮上還。青簾畫舫。乘風南下。與汪鈍翁相值。秦郵湖。遙語曰。有事欲附致家博士。及遣信至。乃

寄舫中所有第二泉四罌而已。汪以道遠稍難之。王攢眉曰。汪大乃成俗吏。程周量嘗撫慈仁寺松。嘆曰。長安諸賢。率皆未登庾嶺。故使諸松浪得盛名。

程名可則。一稱石廬。廣東南海人。舉壬辰會試第一。官桂林守。

大覺禪師云。吾心眼頗平等。然因指見箕尾。甚喜觀水中荇藻。亦喜縱目空碧。亦喜獨對清狂。不慧人刀刁魚魯。殊不耐。

師名通琳。字玉林。江南江陰人。世祖拜爲宏覺國師。

陳士業嘗論當世名流。卓然足自表見者。屈指不過二十輩。其餘率多樊英般浩。聞其姓字。或亦赫然與之狎處。往往使人自咎其傾注之過。

陳名宏緒。江西新建人。清襄公道亨子。賦性警敏。少而好學。集書萬卷。日與四方知名士。講習其中。家以是落。岸然不顧。

吳人有爲正錢錄者。攻摘虞山。不遺餘力。計甫草戲語。客曰。僕自山東來。曾游泰山。登日觀峯。神志方悚。忽欲小遺。甚急。下山且四十里。不可忍。乃潛溺於峯之側。恐得重罪。然竟無恙。何也。山至大且高。人溺焉者衆。泰山不知也。客躍起大罵。吳梅村聞之。頗是計言。周雪客嘗品白岳如五都之市。雖珍異錯目。一覽輒盡。

周名在浚。標園長子。

陸麗京長於引古。毛稚黃善於標新。毛讀陸文。每日苦成語多。

張祖望弟祖靜。祖定。俱能詩。祖靜徵遜。孫字台嘗讀其詩。嘗之曰。人言張氏兄弟如腰鼓。夫豈其然。

祖靜。名獻孫。
祖定。名振孫。

地師沈六如過王丹麓。指庭前不宜種樹。謂口字著木。是困形。不佳。王曰。誠然。吾賢亦未宜立此。口字著人。豈不成囚字乎。沈默然。

假譎

周釜山少以詩名海內。後與宋荔裳同爲郎。遂相與往來賦詩。每一篇出。羣遜謝勿及。周有子鷹垂。方年少。閒嘗誑客。以其詩雜釜山集中。讀者竟無以辨。既而知之。輒驚顧嘆服。鷹垂由是知名。

鷹垂。名綸田。露淵嘗言。釜山少工徐庾家言。鷹垂又復輩聲。揆藻。後先掩映。真庾家之有子山。徐氏之有孝穆也。

雲閒諸乾一董蒼水於重陽後。作神山之會。卽彭仙人棲神處也。時婁東吳梅村在坐。連遣覓女郎倩扶。必不得。夜分。滬上張宏軒刺史來赴。投刺後。吳命以己車迎入。使者傳覆。需兩車。人頗訝之。及至。則挾一衣冠少年。光豔暗射。若薄雲籠月。人各卻步。且不敢詢姓氏。及移燭燭之。則倩扶也。一座譁然。

諸名嗣鄧。一稱勿菴。江南青浦人。辛丑進士。

侯輔之少遭家難。避居嘉興。捕者突至。逮繫登舟。侯默然。手執周易熟視之。倦則依榜人臥。捕者以爲癡。

且以紈袴少年易制也。將抵會城。各簡視行李。或登陸。意益懈。侯睨視兩岸桑翳。然無際。突起竄身坐桑林中。捕者胎聘出不意。疾追不能得。夜燃炬大搜林中。侯望見火光所指。即疾避之。微行近白門。遇詰者。以周易示之曰。吾卜者也。遂脫於難。

侯名怵。河南商邱人。太常卿執蒲季子。大司徒恂。大司成恪。皆同父兄也。兩兄蚤貴。兄子方鎮。方夏。方岳。方巖。方城。皆以才名。交滿天下。家門赫奕莫與比。輔之和雅脩飭。檢身若寒素。不為貴介驕蹇之態。闔戶讀書。孝友恭遜。兩兄亦愛憐之。順治閒。貢入京師。文日有名。人勸之仕。不應。深居簡出。擁書自娛。凝然不苟言笑。得失哀樂。不形於色。平生寡嗜好。獨好飲酒。每飲必醉。醉亦不亂。性不喜廣交。獨於兄子方岳相愛。暨同里賈開宗。徐作肅。徐鄰唐。宋萃。等數人。為文酒之友。意泊如也。

汰侈

翁逢春游臨安。輦囊中金二千於寓廡下。一日。被酒歸。蹴金傷其趾。遽怒呼曰。吾明日用汝不盡。不復稱俠。遂徧召故人游士。及妖童豔唱之屬。期詰旦集湖上。是日。棹舫西泠橋。合數十百人。置酒高會。所贈遺纏頭無算。抵暮問守奴。餘金幾何。則已告盡矣。

翁世居洞庭之東山。官舍人。

忿狷

劉伯宗下第。孫阿匯嘆曰。九華奇秀。不入江上名山誌。巢湖亦江淮巨浸。不入禹貢水經。山川有知。甯不感憤。

孫名濟如。江
南六合人。

黃九煙落落高蹤。時人惡其冷。鄧孝威曰。今已無伯通之廡下。安所得杜陵之草堂耶。只須移家渡江。向九龍峯依阿垣。最爲長策。

黃名周星。江南江寧人。庚辰進士。官戶部。以文章名節自任。兼擅篆籀。工圖章。性骸體難合。雖處困窮。不改其操。君子高之。

鄧名漢儀。江南泰州人。

馮幼將與張樸園書云。淪落既久。耳目都慣。塵沙撲面。只似春風。毒霧侵人。亦如沆瀣。

馮名樸杞。浙
江會稽人。

王仲昭性簡脫。與俗忤。年過壯盛。鬱抑不得行其志。日偕友人散髮袒裸。浮拍糟邱。意極興酣。嘻笑怒罵。不復知人閒事。

夏樂只慷慨任俠。好與貧士遊。客至輒命酒。不給則解敝衣。賁之。有障扇過門者。便欲塞戶。偶有所感。乃首戴瓦盃。哭於西陵橋上。曰。新乎新乎。

夏名基。江南徽州人。僑寓湖濱。能詩工書畫。曠然有高世之志。

尤悔

王西樵里居時。屢空見迫。卒歲。尠歡。嘗雪後出爲人家送葬。從驢子背上。作西樵山人傳一篇。稱心而言。

自謂實錄一出。心跡乖反。遂使此文不復可傳。每爲嘆絕。

袁重其將出遊。母爲脫輕容衣浣澣更紙以衣子。袁衷之。裼以褻衣。久之脆。時就客飲。有躡工爲之按摩。悞爲所裂。初不覺。歸寢解外服。露母前所改衣。襠襠不可卸。大驚。捧衣長號。悔痛終身不能釋。

感溺

張幼量行長白山中。見有巨黃石甚佳。以牛三百頭。拽至園亭。每語人曰。此石絕似大癡畫中物。又嘗愛一竹根石。大不盈寸。根節宛然。撫翫不去手。

張名萬斛。山東鄆平人。

新城二王好爲香奩體。或以綺語爲言。西樵云。不過使我於宣尼廡下。俎豆無分耳。

陳其年嘗作詞懷二王。有云。名士終朝能妄語。阮亭讀至此。笑曰。家兄與下官。不敢多讀。

朱錫鬯詩才雋逸。文尤跌宕可觀。然性好飲酒。嘗與高念祖入都。每日暮泊舟。輒失朱所在。及高往求之。朱已闌入酒肆中。醉臥壚下矣。

朱名彝尊。浙江秀水人。薦舉博學宏詞。考授翰林。

高名佑。鉅。浙江秀水人。

周樸園官閩。每求江瑤柱。輒令藝人取諸梅花厂石閒。其甲上紋如瓦楞。映日視之。與綠玉相類。彩色燦

漫見人眸子。周語人曰。卽此膚理。便足鞭撻海族。惜其生育遐陬。不登玉食耳。

楊香山客揚州。有鸞鶴者。傾囊爲易。二雙載歸。嘲笑並至。楊曰。予門可羅雀。對之如得良友。老乏丁男。撫之如倚玉樹。寂處無絲竹之娛。屢空有交謫之感。戛然一鳴。悅心盈耳。憂鬱可捐。因賦詩十章。爲友誦之。

揚名體元。直隸大興人。官郡司馬。

邵僧彌性舒緩。有潔癖。整拂巾屐。經營几硯。皆人世所不急。乃爲之煩數織悉。僮僕患苦。妻子竊罵。終其身不爲改。

邵名彌。江南長洲人。清羸頹秀。好學。多才藝。於詩宗陶韋。於畫仿宋元。於草書出入大小米。楷法逼虞褚。稱絕工。半生揮灑。小幘尺幅。人皆藏寶以爲重。或購之累數十金。乃用以搜金石。訪雜彝。及圖章玩好諸物。此外蕭然無辦。題所居曰頤堂。置一榻其中。以藥爐茗具自娛。賓客到門。警款雅步。移時始出。與人飲。不半升。類然就睡。雖坐有重客弗顧。中年得小消疾。覽方書多禁忌。和揉燥溼。飲啜多寡。不能適其中。以此益困殆。其迂僻如此。

王于一晚歲客湖上。狎一妓。頗麤陋。或嘲之。王笑曰。近代美人尙肥。

徐野君性灑落。不與人事。獨好觀俳優戲。以爲騷人逸士。與會所至。非此類不足稱知己。

吳介茲食文官萸。每一含咀。不忍直下。嘗語王隆吉曰。香甘雪嫩。令人輒有奴視楊梅雞豆之想。

王名廷棟。江南儀真人。壬子孝廉。

李啓美嗜古學。抱疴十月。猶聚書牀頭讀之。將革。嘆曰。吾死矣。獨念茫茫泉路。能讀書否。悠悠來生。解讀書否。不勝於邑。

李名潛。一名洵。字士美。江南興化人。

辛先民客居吟歎。聞有人招飲。直欲捐性命徇之。或諫其不節。辛笑曰。奈五臟神願馳驅何。

辛名民。一名孺。字嚴公。直隸宛平人。壬午孝廉。官司理。

徐伯調好鍊冲舉。餐氣噉液。嘗自厭毛髮不潔。作游仙詩以自喻。

洪潤孫以博雅擅名。乃有潔癖。每積面。輒自旦達午不休。陸麗京。儂胡。共往看之。洪爾時神氣傲邁。旁若無人。

洪名景融。浙江錢塘人。

查醉白繼婦陸。陸故名家子。性敏。又善詩。嫵婉酬唱。相得益歡。陸亡。查哀痛咯血升許。已復爲悼亡詩百首。多酬陸韻。悵悵若有失。踰年竟死。

查名繼昌。浙江海寧人。七歲善吟詩。十三游庠序。美風儀。郡邑試士。或里社高會。諸少年咸集。查至。詞說慷慨。願盼焯如。一坐驚歎。無不願交。查者。工臨池。能辨古彝器。及唐宋諸家翰墨圖繪。又學射學奕。雖不工。亦自負。

王丹麓喜方術。一日檢書得同夢方。時念張廣平處京師。特千里致書。相期試夢。聞者笑之。

張名元時。浙江杭州人。少時與弟辭奇。同執經應詞賓之門。應便深賞。嘗作詩與廣平云。子既張目無不識。弟亦下筆如有神。兒如亞子真可畏。元方季方安擬倫。後果以詩文聲冠一時。

王丹麓家既落。顧時喜刻書。客至。質衣命酒。其詩曰。平生好賓客。資用苦不周。有懷莫可告。室人且見尤。施愚山誦之。輒失笑曰。蓋有類予者。

全時具載
撰漫興・

今世說 卷八

101